

कुरिन्थियन क पहिली पत्र

1 हमार भाई सोस्थिनेस क साथे पौलुस क अउर जेका परमेस्सर आपन इच्छानुसार मसीह ईसू प्रेरित बनावइ बरे चुनेस।

²कुरिन्थुस में रही परमेस्सर क ओह कलीसिया क नाउँ अहइ यानि ओन सबन का नाउँ, जउन मसीह ईसू में रही परमेस्सर क सेवा करइ बरे नेउछावर रहइ, जेका परमेस्सर पवित्तर मनइयन बनवइ बरे ओकरे साथेन चुनेस। जउन सब जगह पर्भू ईसू मसीह क नाउँ लेत रहत हीं।

³हमारे परमपिता कइँती स अउर हमरे पर्भू ईसू मसीह कइँती स तोहरे सबन क अनुग्रह अउर सान्ति मिलइ।

पौलुस क परमेस्सर क धन्यवाद

⁴तोहरे मसीह ईसू में जउन अनुग्रह कीँहीं गइ बा, ओकरे बरे मई तोहरे कइँती स परमेस्सर क हमेसा धन्यवाद करत अहउँ। ⁵तोहरे पचन क ईसू मसीह में रहइ क कारण हर तरफ स अउर सब बानी अउर सब गियान स परपूर्ण किहा गवा बा। ⁶मसीह क बारे में हम जउन साच्छी दिहे अही उ तोहरे बीच में प्रमाणित भई बा। ⁷अउर एनही क कारण तोहरे लगे ओनके कउनउ इनाम क कमी नाहीं बा। तू हमरे पर्भू ईसू मसीह क परगट होइ बरे इन्तजार करत रहा। ⁸उ तोहरे अन्त तक हमेसा मजबूत बनाए रही जेहसे जब ओहि दिन तोहमाँ कोई गलती न होइ, जब ईसू फिनि स आवइ। हमार पर्भू ईसू मसीह क दिनवा एकदम निहकलंक, खरा बनाए रखीन।

⁹परमेस्सर एकदम बिसवासी अहइ। ओनही क कारण तोहरे हमरे पर्भू अउर ओकरे बेटवा ईसू मसीह क सत संगति बरे बुलावा गवा बा।

कुरिन्थियन क कलीसिया क समस्सिया

¹⁰भाइयो तथा बहिनियो, हमरे पर्भू ईसू मसीह क नाउँ में मोर तोह सवनस बिनती बा कि तू सभन में कउनउ मतभेद न होइ? तू सभे एक साथेन जुटा रहा, अउर तोहार चिन्तन अउर लच्छ एककई होइ। ¹¹भाइयन तथा बहिनियन, मोका खलोए क घराने क लोगन स पता चला ह कि तोहरे पचन क बीच आपस क झगडा बा। ¹²मई इ कहत हउँ कि तोहमें स केऊ कहत ह, "मई पौलुस क हउँ" तउ केऊ कहत ह, "मई अपुल्लोस क

हउँ।" कीहीउ क मत अहइ, "उ पतरस क अहइ।" त केऊ कहत ह, "उ मसीह क अहइ।" ¹³का मसीह बँटे गवा बाटेन? पौलुस तउ तोहरे बरे क्रूस पर नाहीं चढ़ा रह। का वो चढ़ा रहेन? तोह पौलुस क नाउँ क बपतिस्मा तउ नाहीं दिहा गवा। बतावा का दीहा गवा? ¹⁴परमेस्सर क धन्यवाद बा कि मई तोहमा स क्रिसपुस अउर गयुस क छोड़िके कउनो अउर क बपतिस्मा नाहीं दिहा। ¹⁵ताकि कउनउ इ न कहि सकइ कि तू लोगन क हमरे नाउँ क बपतिस्मा दिहा गवा बा। ¹⁶मई स्तिफनुस क परिवार कभी बपतिस्मा दिहे रउँ मुला जहाँ तलक बाकी क लोगन क बात बा, तउ मोका याद नाहीं कि मई कउनो ही अउर क कभउँ बपतिस्मा दिहे होउँ। ¹⁷काहेकि मसीह हमका बपतिस्मा देइ क बरे नाहीं, बल्कि बानी क कउनउ तर्क-वितर्क तथा अलंकार क बिना सुसमाचार क प्रचार करइ क बरे पठए रहा ताकि मसीह क क्रूस अइसेन ही व्यर्थ न चला जाइ।

परमेस्सर क सक्ति अउर गियान-सरूप मसीह

¹⁸उ जउन भटकत हयेन, ओनके बरे क्रूस क संदेस एक निरी मूरखतइ अहइ। मुला जउन उद्धार पावत हयेन ओनके बरे उ परमेस्सर क सक्ति बा। ¹⁹पवित्तर सास्तरन में लिखा बा:

"गियानियन क गियान क मई नस्ट कइ देबइ, अउर मई सब चतुरन क चतुरइ कुंठित करबइ।"

यसायाह 29:14

²⁰कहाँ अहइ गियानी मनई? कहाँ बा विद्वान? अउर एह युगे क सास्त्रार्थी कहाँ अहइ? का परमेस्सर संसारी क बुद्धिमानी क मूर्खता नाहीं सिद्ध किहेस? ²¹इही बरे काहेकि परमेस्सर गियान क जरिये इ संसार अपने बुद्धि बले स परमेस्सर क नाहीं पहिचान सका तउ हम संदेस क कही भइ मूर्खता क प्रचार करत अही। ²²यहूदियन लोग त अद्भुत चीन्हन क मांग करत हीं अउर गैर यहूदियन विवेक क खोज में अहइं। ²³मुला हम तउ बस क्रूस पर चढ़ावा गवा मसीह क ही उपदेस देइत अही। एक अइसेन उपदेस जउन यहूदियन क बरे विरोध क कारण अहइ अउर गैर यहूदियन क बरे निरी मूर्खता।

परमेस्वर क गियान

²⁴मुला ओनके बारे जेनका परमेस्वर द्वारा बोलौंइ लिहा गवा बा, फिन चाहे ओ यहूदी होईं या गैर यहूदी, इ उपदेस मसीह अहइ जउन परमेस्वर क सकती अहइ, अउर परमेस्वर क विवेक अहइ।

²⁵काहेकि परमेस्वर क कही गइ “मूर्खता” मनइयन क गियान स कहुँ जियादा विवेकपूर्ण बा। अउर परमेस्वर क कही गइ “कमजोरी” मनइयन क सकती स कहुँ जियादा सच्छम बा।

²⁶भाइयो तथा बहिनियो, अब तनिक सोचा कि जब परमेस्वर तउ तू बोलाये रहा तउ तोहमें स बहुत जनेन संसारिक विस्ती स न तउ बुद्धिमान रहेन अउर न त सक्तिशाली। तोहमें स कइयउ क सामाजिकइ स्तर भी कउनउ ऊँचा नहीं रहा। ²⁷बल्कि परमेस्वर तउ संसार में जउन कही गइ मूर्खतापूर्ण रहा, ओका चुनेस ताकि बुद्धिमान लोग लजित होईं। परमेस्वर तउ संसार में कमजोरन क चुनेस ताकि जउन मज़बूत अहई, उ सबइ लजित होईं।

²⁸परमेस्वर संसार में स इन बातन क चुनेस जउन नीचे रहिन अउर जउन तुच्छ रहिन अउर जउन कछू नहीं रहिन। परमेस्वर एनका चुनेस ताकि संसार जेका कछू समझत ह, ओका उ खराब कइ सकइ। ²⁹ताकि परमेस्वर क सामने कउनउ मनई अभिमान न कइ पावइ।

³⁰मुला तू मसीह ईसू में उही क कारण स्थित हवा, उहइ परमेस्वर क बरदान क रूप में हमारा बुद्धि बनिगइ अहइ। उही क जरिये हम निर्दोस ठहरावा गएन अउर हम परमेस्वर क समर्पित होइ सकी अउर हमका पापन स छुटकारा मिलि जाइ।

³¹जइसेन कि पवित्र सास्तर में लिखा बा, “अगर कीहीउ क कउनउ घमण्ड करब बाटइ तउन उ पभूँ में घमण्ड करइ।” *

कूस पर चढ़ा मसीह क बारे में संदेश

2 भाइयो तथा बहिनियो जब मई तोहरे लगे आए रहेउँ तउ परमेस्वर क रहस्यपूर्ण सच क, बानी क चतुरता अउर मानुस बुद्धि क साथे उपदेस देत हुए नहीं आइ रहेउँ ²काहेकि मई इ निश्चय कइ लिहे रहेउँ कि तोहरे बीच रहत, मई ईसू मसीह अउर कूस पर भइ ओकर मतत क छोड़िके कउनउ अउर बात क जनबइ तलक नहीं। ³तउन मई दीनता क साथे भय स काँपत भवा तोहरे लगे आएउँ ह। ⁴अउर मोर भासण अउर मोर घोसना मानुस बुद्धि क लुभावइवाले सबदन स मिला नहीं रहा, बल्कि ओहमें रहा आतिमा क सक्ति क प्रमान ⁵ताकि तोहरे बिसवास मानुस बुद्धि क बजाय परमेस्वर क सक्ति पइ टिक सकइ।

⁶जे समझदार अहई, ओनके हम बुद्धि देत अही, काहेकि इ बुद्धि, इ जुग क बुद्धि नहीं बा, न ही एँह जुगे क ओन्हन सासकन क बुद्धि अहइ जेका बिनास क कगार पर लइ आवा जात बा। ⁷एकरे स्थान पर हम तउ परमेस्वर क ओह रहस्यपूर्ण विवेक क देत हीं जउन छुपा हुआ रहा अउर अनादि काल स परमेस्वर हमार महिमा बारे निश्चित किहे रहा। ⁸अउर जेका एँह जुगे क कउनउ सासक नहीं समझेन काहेकि अगर उ सबइ ओका समझ पाए होतेन तउ उ पचे ओह महिमावान पभूँ क क्रूस पर न चढ़उतेन। ⁹मुला पवित्र सास्तरन में लिखा बा:

“जेहे नहीं अंखिया देखेन अउर नहीं काने स सुनेन तक, जहाँ मानुस क बुद्धि तक कभऊँ नहीं पहुँचत ऐसी बानी ओनके बारे बनावाइस पभूँ जे ओनकर पिरेमी जन होइ जातेन।”

यसायाह 64:4

¹⁰मुला परमेस्वर इन बातन क आतिमा क जरिये हमरे बारे परगट किहे अहइ।

काहेकि आतिमा हर कीहीउ बात क ढूँढ निकालत इहाँ तक कि परमेस्वर क छिपी गहराइन तक क। ¹¹अइसेन के अहइ जउन दुसरे मनइयन क मन क बात जानि लेइ सिवाय ओह मनई के ओह आतिमा क जउन ओनके अपने भितरइ अहइ। एह तरह परमेस्वर क बिचारन केऊँ परमेस्वर क आतिमा क छोड़िके अउर कउन जान सकत ह। ¹²मुला हम संसारिक आतिमा नहीं बल्कि ऊ आतिमा पाए अही जउन परमेस्वर स मिलत ह ताकि हम उन बातन क जान सकी जेनका परमेस्वर हमका मुक्त रूप स दिहे बाटइ। ¹³ओनही बातन क हम मनइयन बुद्धि क जरिये बिचारा गवा सबदन में नहीं बोलित बल्कि आतिमा द्वारा बिचारा गवा सबदन स आतिमा क चीजन क बियाखिया करत बोलत अही। ¹⁴एक प्राकृतिक मनई परमेस्वर क आतिमा द्वारा प्रकासित सच क ग्रहण नहीं करत काहेकि ओकरे बारे उ बात खरी मूर्खता होत ह, उ ओन्हे समझि नहीं पावत काहेकि उ आतिमा क आधार पर ही परखी जाइ सकतही। ¹⁵आत्मिक मनई सब बातन क निआव कइ सकत ह, मुला ओकर निआव केऊ नहीं कइ सकत। काहेकि पवित्र सास्तरन कहत हीं:

¹⁶“पभूँ क मन का कउन जान सकत हय? ओका कउन सलाह दइ सकत ह?”

यसायाह 40:13

मनइयन क अनुसरण उचित नाहीं

3 मुला भाइयो तथा बहिनियो, मई तू लोगन स वइसेन ही बात नाहीं कइ सकेउँ जइसे आत्मिक लोगन स करत हउँ। मोका एकरे विपरीत तोहे लोगन स वइसेन बात करइ पड़ी जइसे संसारिक लोगन स कइ जात ह। यानि ओनसे जउन अबहीं मसीह मँ बच्चा अहइँ। ²मई तोहे पियइ क दूध दिहेउँ, ठोस आहार नाहीं, काहेकि तू अबहीं ओका खाइ नाहीं सकत रहेया अउर न तउ तू एका आजउ खाइ सकत अहा ³काहेकि तू अबहीं तलक संसारी अहा। का तू संसारी नाहीं अहा? जबकि तोहमें आपसी इरसा अउर कलह मउजूद बा। अउर तू संसारिक मनइयन जइसा व्यवहार करत अहा। ⁴जब तोहमें स केऊ कहत ह, “मई पौलुस क हउँ” अउर दुसर कहत ह, “मई अपुल्लोस क हउँ” तउ का तू संसारिक मनइयन क स आचरण नाहीं करत्या?

⁵अच्छा त बतावा अपुल्लोस का अहइ अउर पौलुस का अहइ? हम तउ केवल उ सेवक अही जेकरे द्वारा तू बिसवास किहे अहा। हमरे मँ स हर एक बस उ काम किहेस जउन पभू हमका सौंपे रहा। ⁶मई बीज बोएउँ, अपुल्लोस तउ ओका सींचेस, मुला ओकर बढवार तउ परमेस्सर किहेस। ⁷इहइ प्रकार न तउ उ जे बोएस, बड़ा बा, अउर नाहीं उ जउन ओका सींचेस, मुला बड़ा तउ परमेस्सर अहइ जउन एनका बड़ा किहेस। ⁸उ जे बोवत ह अउर उ जउन सींचत ह, दुन्नऊ क प्रयोजन समान बा। तउन हर एक अपने कामन क परिश्रम क अनुसारइ फल पइहीं। ⁹परमेस्सर क सेवा मँ हम सब सहकर्मि अही। तू परमेस्सर क खेत अहा।

अउर तू परमेस्सर क मंदिर अहा। ¹⁰परमेस्सर क ओह अनुग्रह क अनुसार जउन मोका दिहा गवा रहा, मई एक कुसल प्रमुख सिल्पी क रूप मँ नीव डालेउँ मुला ओह पइ निर्माण तउ केऊ अउरइ करत ह, मुला हर एक क सावधानी क साथे धियान रखइ चाही कि उ ओह पर निर्माण कइसे करत बा। ¹¹काहेकि जउन नीव डाली गइ बा उ खुद ईमू मसीह ही अहइ अउर ओसे अलग दूसर नीव केऊ बनाइ नाहीं सकत। ¹²अगर लोग ओह नीव पर निर्माण करत ही, फिन चाहे उ पचे ओहमे सौंन लगावई, चांदी लगावई बहुमूल्य रतन लगावई, लकड़ी लगावई, फूस लगावई या तिनका क प्रयोग करई, ¹³हर मनई क काम स्पष्ट रूप स देखोइ देइ। काहेकि उ दिन ओका उजागर कइ देइ। काहेकि उ दिन जुवाला क साथे परगट होइ अउर उहइ जुवाला हर मनई क कामन क परखी कि उ सबइ काम कइसेन बाटेन। ¹⁴अगर ओह नीव पर कउनउ मनई क करमन क रचना टिकाऊ होइ ¹⁵तउ उ ओकर प्रतिफल पाइ अउर अगर कीहीउँ क काम ओह जुवाला मँ भसम होइ जाइ तउ ओका हानि उठावइ क होइ। मुला फिन भी उ खुद वइसेनही बचि निकरी जइसे कउनउ आगी स बरत भए

भकान स पराइके बचत ह। ¹⁶का तू नाहीं जानत अहा कि तू पचे खुद परमेस्सर क मंदिर अहा अउर परमेस्सर क आतिमा तोहमें निवास करत ह? ¹⁷अगर केऊ परमेस्सर क मंदिर क हानि पहुँचावत ह तउ परमेस्सर ओका नस्त कइ देइ। काहेकि परमेस्सर क मंदिर तउ पवित्तर बा। हाँ, तू ही तउ उ मंदिर अहा।

¹⁸अपने आपके जिन छला, अगर तोहमें स केऊ इ सोचत ह कि इह जुगे क मानदंड क अनुसार उहइ बुद्धिमान बा तउ ओका बस वइसेन हीं मूर्ख बना रहइ चाही ताकि उ सही मँ बुद्धिमान बनि जाइ, ¹⁹काहेकि परमेस्सर क दिस्टी मँ संसारिक चतुराइ मूरखता अहइ। पवित्तर सास्तर कहत ह, “उहइ (परमेस्सर!) फँसाइ देत ह बुद्धिमानन क ओनकेन ही चतुराइ मँ।” ²⁰अउर फिन, “जानत ह पभू बुद्धिमानन क बिचार सब केउ काम क न अहइँ।” ²¹इही बरे मनइयन पर कीहीउ क गरब न करइ चाही काहेकि इ सब कछू तोहार तउ अहइँ। ²²फिन चाहे उ पौलुस होइ, अपुल्लोस होइ या पतरस चाहे संसार होइ, जीवन होइ, या मउत होइ, चाहे इ आज क बात होइ या आवइवाले भियान क। सब कछू तोहरइ ही अहइ। ²³अउर तू मसीह क अहा अउर मसीह परमेस्सर क।

मसीह क संदेस वाहक

4 हमरे बारे मँ कीहीउ मनई क एँह तरह सोचइ चाही कि हम लोग मसीह क सेवक अही। परमेस्सर तउ हमका अउर रहस्यमय सत्य सौंपे अहइ। ²अउर फिन जेका इ रहस्य सौंपे अहइ, ओन पर इ दायित्व भी बा कि उ पचे बिसवास क जोगग होई। ³मोका एँकर तनिकउ चिंता नाहीं बा कि तू लोग मोर निआव करा या मनइयन क कउनउ अउर अदालत। ना मई खुद आपन निआव करत हउँ। ⁴काहेकि मोर मन साफ बा। मुला इहइ कारण मई छूट नाहीं जाइत। पभू उ अहइ जउन निआव करत ह। ⁵इही बरे ठीक समइ आवइ स पहिले मतलब जब तलक पभू न आइ जाइ, तब तलक कीहीउ बात क निआव जिन करा। उहइ अँधियारे मँ छिपी बातन क उजागर करी अउर उ मने क प्रेरणा क परगट करी। ओह समइ परमेस्सर कइँती स हर कीहीउ क उपयुक्त प्रसंसा होइ।

⁶भाइयो तथा बहिनियो, मई इन बातन क अपुल्लोस पर अउर खुद अपने पर तू लोगन क बरे ही चरितार्थ किहे अहउँ ताकि तू पचे हमार उदाहरण देखत भए इन बातन क परे जिन जा जउन सास्तरन मँ लिख बा। ताकि एक मनई क पच्छ लेत अउर दुसरे क विरोध करत भए अँहकार मँ न भरि जा। ⁷कउन क कहत ह कि तू कीहीउ

“उहई ... मैं” अथ्यूब 5:13

“जानत ... अहइ” भजन 94:11

दुसरे स जियादा अच्छा अहा। तोहरे लगे आपन अइसेन का बा? जउन तोहे दिहा नाहीं गवा बा? अउर जब तोहे सब कछू कीहीउ क जरिये दीन्ह गवा बा तउ फिन एँह रूप में अभिमान कउने बात क कि जइसेन तू कउने स कछू पाए ही न अहा।

⁸तू लोग सोचत अहा कि जेह कउनउ चीज क तोहे जरूरत रही, अब उ सब कछू तोहरे लगे बा। तू सोचत ह अब तू सम्पन्न होइ गवा। तू हमरे बिना ही राजा बनि बइठ्या। केतना अच्छा होत कि तू सही में राजा होत्या ताकि तोहरे साथे हमहूँ राज्य करित। ⁹काहेकि मोर बिचार बा कि परमेस्सर हम प्रेरितन क करम-छेत्र में उन लोगन क समान सबसे अन्त में स्थान दिहे अहइ जेनका मउत क सजा दीन्ह जाइ चुकी बा। काहेकि हम पूरा संसार, सरगदूतन अउर लोगन क सामने तमासा बना अही। ¹⁰हम मसीह क बरे मूरख बना अही मुला तू लोग मसीह में बहुत बुद्धिमान अहा। हम कमजोर अही मुला तू तउ बहोत सबल अहा। तू सम्मानित अहा अउर हम अपमानित। ¹¹एँह घड़ी तक हम भूखा पियासा अही। फटा-पुरान चिथड़ा पहिने अही। हमका मारा गवा। हम बेघरे क अही। ¹²आपन हाथन स काम कइके हम मेहनत-मजदूरी करित ह। ¹³गाली खाइके भी हम आसीबाँद देइत ह। सतावा जाइ प हम ओका सहित ह। जब हमार बदनामी होइ जात ह, हम तब भी मीठा बोलित ह। हम अबहूँ जइसेन एह दुनिया क मल-फेन अउर कूड़ा कचरा बना भआ अही।

¹⁴तोहे सबन क लज्जित करइ क बरे मई इ नाहीं लिखत हउँ। बल्कि आपन पिआरे बच्चन क रूप में तोहे सबन क चेतावनी देत हउँ। ¹⁵काहेकि चाहे तोहरे लगे मसीह में तोहरे दसउ हजार सिच्छक मौजूद अहइँ, मुला तोहार पिता तउ अनेक नाहीं अहइ। काहेकि सुसमाचार द्वारा मसीह ईसू में मई तोहार पिता बना हउँ। ¹⁶इही बरे तोहसे मोर आग्रह बा, मोर अनुकरण करा। ¹⁷मई इही बरे तीमुथियुस क तोहरे लगे भेजे रहेउँ। उ पभूँ में स्थित मोर पिआरा अउर बिसवास करइ जोग बेटवा अहइ। मसीह ईसू में मोर आचरण क उ तोहे सबन क याद देवाइ। जेका मई हर कहूँ, हर कलीसियन में उपदेस दिहे हउँ।

¹⁸कछू लोगन अंधकारे में एँह तरह फूल उठा अहइँ इ सोच कर कि मई न आउब। ¹⁹अगर परमेस्सर चाहेस तउ जल्दी ही मई तोहरे लगे अउबइ अउर फिन अंकार में फूला ओन लोगन क मात्र वाचालता क नाहीं बल्कि ओनकर सक्ती क देख लेबइ। ²⁰काहेकि परमेस्सर क राज्य वाचालता पर नाहीं, सक्ती पर टिका बा। ²¹तू पचे का चाहत अहा:

हाथ में पिरैम अउर छड़ी थामे आउब मई तोहरे लगे, कोमल आत्मा साथे में लइ आउब?

कलीसिया में दुराचार

5 सहीयउ में अइसेन बतावा गवा बा कि तू लोगन में दुराचार फइला भआ बा। अइसेन दुराचार-व्यभिचार तउ अधर्मियन तक में नाहीं मिलत। जइसेन केऊँ तउ आपन बिमाता तक क साथ सहवास करत ह। ²अउर फिन तू लोग अभिमान में फूला भआ अहा। मुला का तोहे एकरे बरे दुखी न होइ चाही? जे केऊँ दुराचार करत ह ओका तउ तू पचे अपने बीच स निकाल बाहेर करइ चाही। ³मई जद्यपि सारीरिक रूप स तोहरे बीच नाहीं अही मुला आत्मिक रूप स तउ हुँवैँ हाजिर अही। अउर माना ऊहाँ हाजिर रहत भआ जे अइसेन खराब काम किहे अहइँ, ओकरे विरुद्ध मई आपन इ निर्णय दइ चुका अही ⁴कि जब तू हमरे साथे हमार पभूँ ईसू क नाउँ में हमार आत्मा अउर हमार पभूँ ईसू क सक्ति क साथे इकट्टा होब्या। ⁵तउ अइसेन मनई क ओकर भौतिक मानुस सुभाउ क खराब कइ डालइ बरे सइतान क सौँप दीन्हा जाई ताकि पभूँ क दिना ओनके आत्मा क बचावा जाइ सकइ।

⁶तोहर इ बड़बोलापन अच्छा नाहीं बा। तू एह कहावत क त जानतही अहा, “तनिक खमीर आटा क पूरा लउँदा क खमीरमय कइ देत ह।” पुराने खमीर स छुटकारा पावा ताकि तू आटा क नया लौँदा बनि सका। तू तउ बिना खमीरवाली फसह क रोटी क समान हवा। हमका पवित्तर करइके बरे मसीह को फसह क मेमने क रूप में बलि चढ़ाइ दीन्ह गवा। ⁸इही बरे आवा हम आपन फसह क त्रौहार बुराइ अउर दुस्तइद स युक्त पुरान खमीर क रोटी स नाहीं बल्कि निस्टा अउर सत्य स युक्त बिना खमीर क रोटी स मनाई। ⁹अपने पिछले चिट्ठी में मई लिखे रहेउँ कि तोहे ओन लोगन स आपन नाता नाहीं रखइ चाही जउन व्यभिचारी अहइँ। ¹⁰मोर इ प्रयोजन बिल्कूल नाहीं रहा कि तू एँह दुनिया क व्यभिचारियन, लोभी लोगन, ठगन या मूर्ति पूजकन स कउनउ सम्बन्ध ही जिन रखा। अइसेन होइ पइ तउ तोहे सबन क इ संसार स ही निकरि जाइ क होइ। ¹¹मुला मई तोहे सबन क जउन लिखेउ ह उ इ अहइ कि कउनउ अइसेन मनई स नाता न रखा जउन अपने आपक मसीही बन्धु कहवाइ क भी व्यभिचारी, लोभी, मूर्तिपूजकन, चुगलखोर, पिक्ककड़ या एक ठग अहइँ। अइसेन मनई क साथे त भोजन भी ग्रहण जिन करा। ¹²जउन लोग बाहेर क बाटेन, कलीसिया क नाहीं, ओनकर निआव करइके भला मोर का काम। का तोहे ओन्हीन क निआव न करइ चाही जउन कलीसिया क भितर क अहइँ? ¹³कलीसिया क बाहेरवालन क निआव तउ परमेस्सर ही करी। पवित्तर सास्तर कहत ह, “अपने बीच से, तू पापी क निकार बाहर करा।” *

“अपने ... करा” व्यवस्था 22:21, 24

आपसइ क विवादन क निपटारा

6 का तोहरे में स केउ अइसेन बा जउन अपने साथी क साथे केउ झगडा होइ पे परमेस्सर क पवित्तर मनइयन क लगे न जाइके अधर्मी लोगन क अदालत में जाइके साहस करत होइ? 2या का तू पचे इ नाहीं जानत अहा कि परमेस्सर क पवित्तर मनई ही सारे संसार क निआव करिहीं? अउर जब तोहरे जरिये समूचइ संसार क निआव किन्ह जाइ क बाटइ तउ का इन छोट-छोट बातन क निआव करइ जोग्ग तू नाहीं अहा? 3का तू नाहीं जानत अहा कि हम सरगदूतन क भी निआव करबइ? फिन इ जीवन क इन रोज़मर्रा क छोट-मोट बातन क त कहबइ ही का। 4अगर हर दिन तोहरे बीच कउनउ न कउनउ विवाद रहतइ ही रहत ह तउ का न्यायाधीस क रूप में तू पचे अइसेन मनइयन क नियुक्ति करब्या जेनकर कलीसिया में कउनउ स्थान नाहीं बा। 5इ मई तोहसे एह बरे कहत हउँ कि तोहे सबन क कछू लाज आवइ। का स्थिति ऐंती बिगड़ि चुकी बा कि तोहरे बीच केऊँ अइसेन बुद्धिमान मनई अहइ नाहीं जउन अपने मसीही भाइयन क आपसी झगडा सुलझाइ सकइ? 6का एक भाई कहँ अपने दुसरे भाई स मुकदमा लड़त थ। अउर तू तउ अबिसवासियन क सामने अइसा करत रहे रह्या।

7असलिमत में तोहर पराज्य तउ इही में होइ चुकी कि तोहरे बीच आपस में एक दूसरे क खिलाफ कानूनी मुकदमा अहइँ। एकरे स्थान पर तू आपस में अनिआव ही काहे नाहीं सही लेत्या? अपने आप क काहे नाहीं लुटि जाइ देत्या। 8अरे अनिआव तू तउ खुदइ करत अहा अउर अपने ही मसीही भाइयन क लूत अहा।

9अउर का तू नाहीं जानत अहा कि खराब लोग परमेस्सर क राज्य क उत्तराधिकार न पइहीं? अपने आप को धोखा न द्या। व्यभिचार करइवाला, मूर्तिपूजक, व्यभिचार, गुदा-भंजन करइवाला, लौंडेबाज़, 10लुटेरे, लालची, पिक्कड़ चुगलखोर अउर ढग परमेस्सर क राज्य क उत्तराधिकारी न होइहीं। 11तोहमें स कछू अइसेन ही रहेन। मुला अब तोहे सबन क थोड़े-मांजिके पवित्तर कइ दिहे हउँ। तोहे परमेस्सर क सेवाँ में अरपित कइ दिन्हा वा बा। पभू ईसू मसीह क नाउँ अउर हमरे परमेस्सर क आतिमा क द्वारा ओन्हे धर्मी करार दिन्हा जाइ चुका बा।

अपने सरिरी क परमेस्सर क महिमा में लगाव

12"मई कछू भी करइ क स्वतन्त्र हउँ" मुला हर कउनउ बात हितकर नाहीं होत। हौं, "मई सब कछू करइ क स्वतन्त्र हउँ" मुला मई अपने पर कीहीउ क हावी न होइ देबा। 13कहा जात ह, "भोजन पेट क बरे बा, अउर पेट भोजन क बरे।" मुला परमेस्सर इन दुन्नउ क ही समाप्त कइ देई। अउर हमरे सारीरक तउ भी व्यभिचार

क बरे नाहीं बा बल्कि पभू क सेवा क बरे बा। अउर पभू हमार देह क कल्लियान क बरे बा। 14परमेस्सर न केवल पभू क ही पुनर्जीवित नाहीं किहेस बल्कि आपन सकती स उ मउत स हम सबे कभी जियाइ उठाई। 15का तू नाहीं जानत अहा कि तोहरे सरिरी खुद ईसू मसीह का हिस्सा अहइ? तउ का मोका ओन्हे, जउन मसीह क अंग हयेन, कउनउ वेस्या क अंग बनाइ देइ चाही? 16निस्चय ही नाहीं। अउर का तू इ नाहीं जानत अहा, कि जउन अपने आपके वेस्या स जोड़त ह, उ ओकरे साथे एक देह होइ जात ह। पवित्तर सास्तरन में कहा गवा बा: "काहेकि उ दुन्नऊ एक होइ जइ ही,"*

17मुला उ जउन आपन लौ पभू स लगावत ह, उ आतिमा में एकाकर होइ जात ह।

18व्यभिचार स दूर रहा। दुसरे सभन पाप जेका एक मनई करत ह, ओकरे सरिरी स बाहेर होत हीं मुला अइसेन मनई जउन व्यभिचार करत ह उ तउ अपने सरिरी क विरुद्ध पाप करत ह। 19अउर का तू नाहीं जानत अहा कि तोहार सरिरी ओह पवित्तर आतिमा क मंदिर अहइ जेका तू परमेस्सर स पाए अहा अउर जेका तू आपन बनाइ क न रख सक्या। अउर उ आतिमा तोहर आपन नाहीं बा। 20काहेकि परमेस्सर तोहे सबन क कीमत चुकाइ क खरीदे अहइ इही करे अपने सरिरी क द्वारा परमेस्सर क इज्जत कर।

बियाह

7 अब इन बातन क बारे में जउन तू लिखे रह्या: अच्छा इ बा कि कउनउ मनई कीहीउ स्त्री स बियाह न करइ। 2मुला यौन अनैतिकता क घटना क सम्भवावनावन क कारण हर पुरुस क आपन पत्नी होइ चाही अउर हर स्त्री क आपन पति। 3पति क चाही कि पत्नी क रूप में जउन कछू पत्नी क अधिकार बनत ह, ओका देइ। अउर इही तरह पत्नी क भी चाही कि पति क ओकर यथोचित प्रदान करइ। 4अपने सरिरी पर पत्नी क कउनउ अधिकार नाहीं बा, बल्कि ओकरे पति क बा। अउर इही तरह पति क ओकरे अपने सरिरी पर कउनउ अधिकार नाहीं बा, बल्कि ओकरे पत्नी क अहइ। 5अपने आप क पराधना में समर्पित करइ क बरे थोड़े समइ तक एक दूसरे स समागम न करइ क आपसी सहमति क छोड़िके, एक दूसरे क संभोग स वंचित जिन करा। फिन आतिमा संयम क अभाउ क कारण कहँ सइतान तोहे कउनउ परीच्छा में न डालि देइ, इही बरे तू फिन समागम कइ ल्या।

6मई इ एक छट क रूप में कहत रहत हउँ, आदेस क रूप में नाहीं। 7मई तउ चाहित हउँ सभन लोग मोरे जइसेन होतेन। मुला हर मनई क परमेस्सर स एक

"काहेकि ... जइ ही" उत्पत्ति 2:24

विशेष बरदान मिला बा। कीहीउ क जिअइ क एक ढंग बात त दुसरे क दूसर।

⁸अब मोका अविवाहितन अउर विधवा क बारे में इ कहब बा: अगर उ हमरे समान अकेल ही रहइँ तउ ओकरे बरे इ अच्छा रही। ⁹मुला अगर उ पचे अपने आप पर काबू न रख सकइँ तउ ओहे बियाह कइ लेइ चाही, काहेकि वासना क आग में जलत रहइ स विआह कइ लेब अच्छा बा।

¹⁰अब जउन विवाहित अहउँ ओनका हमार ई आदेस बा, यद्यपि इ हमार नाहीं बा बल्कि पभूँ क आदेस बा कि कउनउ पत्नी आपन पति क न तियागइ चाही। ¹¹मुला अगर उ ओका छोड़िही देइ तउ ओका फिन अनब्याहा ही रहइ चाही या अपने पति स मेल-मिलाप कइ लेइ चाही। अउर अइसेन ही पति क अपनी पत्नी क छोड़इ न चाही।

¹²अब सेस लोगन स मोर इ कहब बा: (ई मईँ कहत हउँ न कि पभूँ) अगर कि कउनो मसीही भाई क कउनउ अइसी पत्नी बा जउन एँह मते में बिसवास नाहीं रखत अउर ओकरे साथे रहइ क सहमत बा त ओका तियाग देइ चाही। ¹³अइसेन ही अगर कउनो स्त्री क कउनउ अइसेन पति बा जउन पथ क बिसवासी नाहीं अहइ मुला ओकरे साथे रहइ क सहमत बा त ओह स्त्री क भी आपन पति तियागइ न चाही। ¹⁴काहेकि उ अबिसवासी पति बिसवासी पत्नी क लगे क सम्बन्ध क कारण पवित्तर होइ जात ह अउर इही तरह उ अबिसवासी पत्नी अपने बिसवासी पति क हमेसा साथ रहे स पवित्तर होइ जात ह। नाहीं तउ तोहार सन्तान अस्वच्छ होइ जात मुला अब तउ उ पचे पवित्तर बाटेन।

¹⁵फिन भी अगर केउ अबिसवासी अलग होइ चाहत ह तउ उ अलग होइ सकत ह। अइसन स्थितियन में कउनो मसीह भाई या बहिन पर कउनउ बंधन लागू न होई। परमेस्सर हमका सान्ति क साथे रहइ क बोलाए अहइ। ¹⁶हे पत्नियो, का तू पचे जानत अहा? होई सकत ह तू अपने अबिसवासी पति क बचाइ ल्या। हे पति, का तू जानत ह? होइ सकत ह तू अपने अबिसवासी पत्नी क बचाइ ल्या।

जइसन अहा, वइसेइ जिआ

¹⁷पभूँ जेका जइसेन दिहे अहइ अउर जेका जेह रूप में चुनें अहइ, ओका वइसेन ही जियइ चाही। सभन कलीसियन में मईँ इही क आदेस देत हउँ। ¹⁸जब किहूँ क परमेस्सर क द्वारा बोलावा गवा, तब अगर उ खतना युक्त रहा तब ओका आपन खतना छिपावइ न चाही। अउर किहूँ क अइसेन दसा में बोलावा गवा जब उ बिना खतना क रहा तउ ओकर खतना करावइ न चाही। ¹⁹खतना तउ कछूँ नाहीं बाटइ, अउर न ही खतना न होब कछूँ बा। बल्कि परमेस्सर क आदेसन क पालन

करब ही सब कछूँ अहइ। ²⁰हरि किहूँ क उही स्थिति में रहइ चाही, जेहमें ओका बोलावा गवा बा। ²¹का तोहे सबन क दास क रूप में बोलावा गवा बा? तू एकर चिन्ता जिन करा। मुला अगर तू स्वतंत्र होई सकत ह तउ आगे बढ़ा अउर अवसर क लाभ उठावा। ²²काहेकि जेका पभूँ क दास क रूप में बोलावा गवा, उ तउ पभूँ क स्वतंत्र मनईँ अहइ। इही तरह जेका स्वतंत्र मनईँ क रूप में बोलावा गवा, उ मसीह क दास अहइ। ²³परमेस्सर कीमत चुकाइके तोहे सबन क खरीदे बाटइ। इही बरे मनइयन क दास न बना। ²⁴भाइयो, तोहे जउनने स्थिति में बोलावा गवा बा, परमेस्सर की सामने उही स्थिति में रहा।

बियाह करइ सम्बन्धी प्रश्नन क उत्तर

²⁵अविआहा क सम्बन्ध में पभूँ कइँती स मोका कउनो आदेस नाहीं मिला बा। इही बरे मईँ पभूँ क दया पाइके बिसवासी होइ क कारण आपन राय देत हउँ। ²⁶मईँ सोचत हउँ कि एह वर्तमान संकट क कारण इहइ अच्छा बा कि कउनउ मनईँ मोरे समान ही अकेला रहइ। ²⁷अगर तू विवाहित अहा तउ ओसे छुटकारा पावइ क यत्न जिन करा। अगर तू पत्नी स मुक्त अहा तउ ओका खोजा न। ²⁸मुला अगर तोहार जीवन विवाहित बा तउ तू कउनउ पाप नाहीं किहे अहा। अउर अगर कउनउ कन्या बियाह करत ह, तउ कउनउ पाप नाहीं करत ह मुला अइसेन लोग सररीक कट उटइहीं जेनसे मईँ तोहे सबन क बचावइ चाहत हउँ।

²⁹भाइयो तथा बहिनियो, मईँ तउ इहइ कहत हउँ, समइ बहुत कम बा। इही बरे अब आगे, जेनके लगे पत्नियन अहइँ उ पचे अइसन ही रहइँ, माना उनके पास पत्नियन हइयइ नाहीं हइन। ³⁰अउर उ सबइ जउन विलखत अहइँ उ पचे, अइसेन रहइँ, माना कबहूँ दुखही न भवा होइ। अउर जउन आनन्दित हयेन, उ पचे अइसेन रहइँ, माना खुसइ नाहीं भवा रहेन। अउर उ पचे जउन चीज मोल लेत हीं, अइसेन रहइ माना ओनके लगे कछूँ न होइ। ³¹अउर जउन संसारिक सुख-बिलासन क भोग करत हयेन, उ पचे अइसेन रहइँ, माना उ पचे चीज ओनके बरे कउनउ महत्व नाहीं रखत। काहेकि इ संसार अपने वर्तमान सरूप में नासवान बा।

³²मईँ चाहत हउँ आप लोग सबइ चिन्ता स मुक्त रहा। एक अविवाहित मनईँ पभूँ सम्बन्धी विसयन क चिन्तन में लगा रहत ह कि उ पभूँ क कइसे खुस करइ। ³³मुला एक विवाहित मनईँ संसारिक विसयन में ही लिप्त रहत ह कि उ आपन पत्नी क कइसे खुस कइ सकत ह। ³⁴एह तरह ओकर व्यक्तित्व बँटि जात ह। अउर अइसेन कउनउ अविवाहित पत्नी या कुआरी कन्या क जेका बस पभूँ सम्बन्धी विसयन क ही चिन्ता रहत ह। जेहसे उ अपने सररीर अउर आपन आत्मा स

पवित्तर होइ सकइ। मुला एक विवाहित स्त्री सांसारिक बिसय भोगन मँ एँह तरह लिप्त रहत ह कि उ अपने पति क रिद्धावत रहि सकइ।

³⁵इ मई तोहसे तोहरे भले क बरे ही कहत हउँ तोह पर बन्धन लगावे क बरे नाहीं। बल्कि अच्छी व्यवस्था क हित मँ अउर इही बरे कि तू चित्त क चंचलता क बिना पभू क समर्पित होइ सका।

³⁶अगर केउ सोचत ह कि उ आपन जवान होइ चुकी कुंआरी बिटिया क बरे उचित नाहीं करत बा अउर अगर ओकर काम भावना तेज बा, अउर दुन्नऊ क ही आगे बढ़िके बियाह कइ लेइ क जरूरत बा, तउ जइसन उ चाहत ह, ओका आगे बढ़िके वइसेन ही कइ लेइ चाही उ पाप नाहीं करत बा। ओका बियाह कइ लेइ चाही। ³⁷मुला जउन अपने मने मँ बहुत पक्का अहइ अउर जेह पर कउनउ दबावउ नाहीं बा, बल्कि जेकर इच्छन पर पूरा बस बा अउर जे अपने मने मँ पूरा निस्वय कइ लिहे बा कि अपने प्रिया स बियाह न करइ तउ उ अच्छा ही करत बा। ³⁸तउ उ जउन आपन प्रिया स बियाह कइ लेत ह, अच्छा करत ह अउर जउन ओसे बियाह नाहीं करत उ अउर भी अच्छा करत ह।

³⁹जब तलक किहउ स्त्री क पति जिन्दा रहत ह, तबउ तलक उ बियाह क बन्धन मँ बंधी होत ह मुला अगर ओकरे पति क मउत होइ जात ह, तउ जेकरे साथे चाहइ बियाह करइ, उ स्वतन्त्र बा मुला केवल पभू मँ। ⁴⁰पर अगर जइसेन उ बा वइसेन ही रहत ह, त जियादा खुस रही। इ मोर विचार अहइ। अउर मई सोचत अहउँ कि मोहँ मँ परमेस्सर क आतिमा क ही निवास अहइ।

चढावइ क भोजन

8 जब मूर्तियन पर चढाइ गइ बलि क बारे मँ: हम इ जानित ह, “हम सबहिं गियानी अही।” “गियान” लोगन क अहंकार स भरि देत ह। मुला पिरेम स मनई अधिक सक्तिशाली बनत ह। ²अगर केऊँ सोचइ कि उ कछू जानत ह तउ जेका जानइ चाही ओकरे बारे मँ तउ ऊ अबहूँ कछू जनबइ नाहीं करत। ³अगर केउ परमेस्सर क पिरेम करत ह त उ परमेस्सर क जरिये जाना जात ह।

⁴तउन मूर्तियन पर चढावा गवा भोजन क बारे मँ हम जानत अही कि एह संसारे मँ मूरति का अस्तित्व नाहीं बा। अउर इ कि “परमेस्सर केवल एकइ अहइ।” ⁵अउर धरती या आकास मँ जद्यपि अइसेन ही देवता बहुत स अहई (बहुत स “देवता” हयेन, बहुत स “पभू” हयेन) मुला हमरे बरे तउ एकइ परमेस्सर बा, हमार पिता। उही स सब कछू आवत ही अहइ। अउर ऊही क बरे हम जिअत अही। पभू केवल एक अहइ, ईसू मसीह। उही क द्वारा सब चीजन क अस्तित्व बा अउर ऊही क जरिये हमार जीवन बा।

⁷मुला इ गियान सब कीहीउ क लगे नाहीं अहइ। कछू लोग जउन अब तलक मूर्ति पूजा क आदी अहई, अइसेन चीजन खात हीं अउर सोचत हीं जइसेन माना उ चीज मूर्ति क प्रसाद अहइ। ओनके इ करमे स ओनकर आतिमा कमजोर होइ क कारण दूसित होइ जात ह। ⁸मुला उ प्रसाद तउ हमका परमेस्सर क लगे न लइ जाइ। अगर हम ओका नाहीं खाइ तउ कछू घटी नाहीं जात अउर अगर खाई तउ कछू बढ़ नाहीं जात।

⁹सावधान रहा। कहूँ तोहरे इ अधिकार ओकरे बरे, जउन कमजोर बाटेन, पाप मँ गिरइ क कारण न बन जाइ। ¹⁰काहेकि कमजोर बिसवास क कउनउ मनई अगर तोहे जइसेन इ बिसय क जानकार क मूर्तिवाला मंदिर मँ खात भआ देखत ह तउ ओकर दुर्बल मन का ओह हद तलक न भटक जाई कि उ मूर्ति पर बलि चढाइ गइ चीजन क खाइ लागेन। ¹¹तोहरे गियान स, कमजोर मने क मनई क तउ नास ही होइ जाइ तोहरे उहीं बन्धु क, जेकरे बरे मसीह तउ जान दइ दिहसे। ¹²इही तरह अपने भाइयन अउर बहिनियन क विरुद्ध पाप करत भए अउर ओनके कमजोर मने क चोट पहुँचावत भए तू लोग मसीह क विरुद्ध पाप करत अहा। ¹³एँह बरे अगर भोजन मोरे भाई क पाप क राह पर बढ़ावत ह तउ मई फिन कभउँ मौस न खाबइ ताकि मई अपने भाई क बरे, पाप करइ क कारण न बनउँ।

पौलस भी दुसरे प्रेरितन जइसा अहइ

9 का मई स्वतन्त्र नाहीं हउँ? का मई भी एक प्रेरित नाहीं हउँ? का मई हमार पभू ईसू मसीह क दर्शन नाहीं किहे अहउँ? का तू लोग पभू मँ मोर इ करम क उदाहरण नाहीं अहा? ²चाहे दुसरन क बरे मई प्रेरित न भी होउँ तबउ मई तोहरे बरे त प्रेरित हउँ। काहेकि तू एक अइसेन मोहर क समान अहा जउन पभू मँ मोरे प्रेरित होइ क प्रमाणित करत ह।

³उ लोग जउन मोर जाँच करइ चाहत हीं, ओनके बरे आपन सकाई देइ मँ मोर उत्तर इ अहइ: ⁴का हमका खाइ पीयइ क अधिकार नाहीं बाटइ? ⁵का हमका इ अधिकार नाहीं कि कउनो बिसवासिनी पत्नी क हम अपने साथे लइ जाइ? जइसेन कि दूसर प्रेरित, पभू क बन्धु अउर पतरस किहे रहेन। ⁶अउर का बरनाबास अउर मोरे लगे ही इ अधिकार बा कि आपन आजीविका कमाइ क बरे हम कउनउ काम न करीं? ⁷सेना मँ अइसेन के होइ जउन एक सिपाही क रूपे मँ अपने क वेतन देइ। अउर के होइ जउन अंगूर क बगिया लगाइके ओकर फल न चखी? या कउन अइसा अहइ जउन भेड़न क खरका क देखभाल न करत होइ पर ओकर दूध न पीअत होइ?

⁸का हम मानवीय चिन्तन क रूपे मँ ही अइसेन कहत हई? आखिरकार का व्यवस्था क विधान भी

अइसेन नाहीं कहत? ⁹मूसा क व्यवस्था मँ लिखा बा, “खरिहाने मँ बरधा क मुँह जिन बाँधा।” * का परमेस्सर केवल बरधन क बारे मँ बतावत अहइ? ¹⁰(निस्चित रूप स उ एका क हमरे बारे नाहीं बतावत अहइ? हाँ, इ) हमरे बारे ही लिखा गवा रहा। काहेकि खेत जोतइवाला कीहीउ आसा स ही खेत जोतइ अउर खरिहाने मँ भूसा स अनाज अलगावइवाला फसल क कछू भाग पावइ क आसा तउ रखी। ¹¹फिन अगर हम तोहरे हिते क बारे आत्मिक बिया बोए अही तउ हम तोहसे भौतिक चीजन क फसल काटइ चाहित ह, इ का कउनउ बहुत बड़ी बात बा? ¹²अगर दूसर लोग तोहसे भौतिक चीजन पावइ क अधिकार रखत हीं तउ हमार तउ तोह पइ का अउर भी जियादा अधिकार नाहीं बा? मुला हम इ अधिकार क उपयोग नाहीं किहे अही। बल्कि हम तउ सब कछू सहत रहे ताकि हम मसीह क सुसमाचार क रस्ता मँ कउनउ बाधा न डाली देइ। ¹³का तू नाहीं जानत बाट्या कि जउन लोग मंदिर मँ काम करत हीं उ पचे आपन खाना मंदिर स ही पावत हीं। अउर जउन नियमित रूप स वेदी क सेवा करत हीं, वेदी क चढ़ावा मँ ओनकर हिस्सा होत ह? ¹⁴इही तरह पभू व्यवस्था दिहे अहइ कि सुसमाचार क प्रचारकन क आजीविका सुसमाचार क प्रचार स ही होइ चाही।

¹⁵मुला ओहन अधिकारन मँ स मई एक क कभउँ प्रयोग नाहीं किहेउँ। अउर इ बात मई एह बारे लिखेउँ नाहीं कि अइसेन कछू मोरे बिसय मँ कीन्हा जाई। बजाय एकरे कि कउनउ मोसे ओह बात केउ छीन लेइ जेकर मोका गरब बा। ऐसे तउ मई मरि जाब ही ठीक समझबा। ¹⁶एह बारे अगर मई सुसमाचार क प्रचार करित ह तउ एहमाँ मोका गरब करइके कउनउ हेतु नाहीं बा काहेकि मोर त इ कर्तव्य बा। अउर अगर मई सुसमाचार क प्रचार न करउँ तउ मोरे बारे इ केतना खराब होइ। ¹⁷फिन अगर इ मई अपने इच्छा स करित ह तउ मई एकर पुरस्कार पावइ योग्य हई, परन्तु अगर आपन इच्छा स नाहीं बल्कि कउनो नियुक्ति क कारण इ काम मोका सौंपा गवा ह। ¹⁸तउ फिन मोर पुरस्कार काहे क? इही बारे जब मई सुसमाचार क प्रचार करीत हउँ विना कउनउ मूल लिहे ही ओका करउँ। ताकि सुसमाचार क प्रचार मँ जउन कछू पावइ क मोर अधिकार बा, मई ओकर कुल उपयोग न करउँ।

¹⁹जद्यपि मई किहू मनई क बन्धन मँ नाहीं हउँ, फिन मई खुद क तोहरे सबन क गुलाम बनाइ लिहे हउँ। ताकि मई अधिकतर लोगन क जीत सकउँ। ²⁰यहूदियन क बारे मई एक यहूदी जइसेन बनउँ, ताकि मई यहूदियन क उद्धार मँ मदद करि सकउँ मई खुद व्यवस्था क अधीन नाहीं अहउँ। जउन लोग व्यवस्था क अधीन

अहई, ओनके बारे मई एक अइसेन मनई बारे जउन व्यवस्था क अधीन जइसेन बनेउँ। इ मई एह बारे किहे कि मई व्यवस्था क अधीनन क उद्धार करवइ मँ मदद कइ सकउँ। ²¹मई एक अइसेन मनई बने जउन व्यवस्था क नाहीं मानत। जद्यपि मई परमेस्सर क व्यवस्था स रहित नाहीं हउँ बल्कि मसीह क व्यवस्था क अधीन हउँ। तउ कि मई जउन व्यवस्था क नाहीं मानत हउँ ओन्हे जीत सकउँ। ²²जउन मनइयन कमजोर अहई, ओनके बारे मई कमजोर बनेउँ ताकि मई कमजोरन क उद्धार करावइ मँ मदद कइ सकी। हर किहू क बारे मई हर किहू जइसेन बनेउँ त कि हर सम्भव उपाय स ओनकर उद्धार कइ सकउँ। ²³इ सब कछू मई सुसमाचार क बारे करत हउँ ताकि एकरे बरदानन मँ मोर भी कछू भाग होइ।

²⁴का तू लोग इ नाहीं जानत अहा कि खेल क मैदान मँ दौड़त सबहिँ धावक बाटेन मुला इनाम कउनो एक क मिलत ह। अइसेन दउड़ा कि जीत तोहार होइ सकइ। ²⁵कउनो खेल प्रतियोगिता मँ हर एक प्रतियोगी क हर तरह क आत्मा संयम करब होत ह। उ एक नासमान कीर्तिमान स सम्मानित होइ क बारे करत हीं मुला हम तउ एक अविनासी मुकुट क पावइ बारे इ करित ह। ²⁶एह तरह मई ओह मनई क समान दौड़त हउँ जेकरे सामने एक लच्छ बा। मई अहइ मुक्केबाज क तरह मुक्का मारत मारत हउँ मुला मई हवा मँ मुक्का नाहीं मारत हउँ। ²⁷बल्कि मई तउ आपन सरीर क कठोर अनुसासन मँ तपाइके, ओका अपने बस मँ करत हउँ। ताकि कहूँ अइसेन न होइ जाइ कि दुसरन क उपदेस देइ क बाद परमेस्सर क जरिये मई इ बेकार ठहराइ दीन्हे जाउँ।

यहूदियन जइसेन न बना

10 भाइयो तथा बहिनियो, मई चाहित हउँ कि तू इ जान ल्या कि हमरे पूर्वजन क का भवा रहा जउन मूसा क व्यवस्था क मानत रहेन। अउर उ सबहिँ बादल क छत्र छाया मँ सुरच्छापूर्वक लाल सागर पार कइ ग रहेन। ²ओहन सब क बादल क नीचे अउर समुद्र मँ मूसा क अनुयायी क रूप मँ बपतिस्मा दीन्हा गवा रहा। ³ओन सभन क समान आत्मिक भोजन खाए रहेन। ⁴अउर उ सबइ समान आत्मिक पेय पिए रहेन काहेकि उ अपने साथे चलत रही उ आत्मिक चट्टान स ही जल ग्रहण करत रहेन। अउर उ चट्टान रही मसीह। ⁵मुला ओहमें स अधिकांस लोगन स परमेस्सर खुस नाहीं रहा, इही बारे उ पचे मरुभूमि मँ मरि गएन।

⁶इ बातन अइसेन घटिन कि हमरे बारे उदाहरण सिद्ध होइ गइन। एहसे हम खराब बातन क कामना न करी जइसेन ओहन किहे रहेन। ⁷मूर्ति पूजक न बना, जइसेन कि ओहमाँ स कछू रहेन। पवित्र सास्तरन

कहत ह: "मनई खाइ पिअइ क बरे बइठा अउर परस्पर आनन्द मनावइ क बरे उठा।" * 8तउन आवा हम कभउँ व्यभिचार न करी जइसेन ओहमें स कछू किये रहेन। इही नाते ओहमें स 2,300 मनई एककइ दिन मरि गएन। 9आवा हम मसीह क परीच्छा न लेइ, जइसेन कि ओहमे स कछू जने लिये रहेन। परिणाम उ लोग साँप द्वारा मारा गएन। 10सिकवा-सिकायत न करा जइसेन कि ओनमें स कछू करत रहत रहेन अउर इही कारण विनास क सरगवूत क जरिये मार डावा गएन।

11इ बात ओनके साथे अइसेन घटी कि उदाहरण बन जाइ। अउर ओन्हे लिख दीन्हा गवा कि हमरे बरे जेह पर युगे क अंत उतरा भवा बा, चेतावनी रहइ। 12एह बरे जउन इ सोचत ह कि उ मजबूती स खड़ा अहइ, ओन्हे सावधान रहइ चाही कि उ गिर न पड़इ। 13तू पचे कउनो अइसेन परीच्छा में नाहीं पड़ा अहा जउन, मनइयन क बरे सामान्य नाहीं बा। परमेस्सर बिसवासनीय अहइ। उ तोहार सक्ति स ज्यादा तोहे परीच्छा में न पड़इ देई। परीच्छा क साथे-साथे ओसे बचइ क रस्ता भी तोहे सबन क देइ ताकि तू परीच्छा क उत्तीर्ण कइ सका।

14हमार पिआरा दोस्तन, अंत में मई कहत हउँ मूर्ति पूजा स दूर रहा। 15तोहे समझदार समझिके मई अइसेन कहत हउँ। जउन मई कहत हउँ, ओका अपने आप परखा। 16धन्यवाद क पियाला जेकरे बरे हम धन्यवाद देत हई, उ का मसीह क लहू (मृत्यु) में हमार साझेदारी नाहीं बा? उ रोटी जेका हम तोड़त त हई, का ईसू देह में हमार साझेदारी नाहीं बा? 17रोटी क होब एक अइसा तथ्य अहइ, जेकर अर्थ बा कि हम सब एककइ सररी स अही। काहेकि ओही रोटी में ही हम सब का साझेदारी बाटइ।

18ओन्हन इम्राएलियन (यहूदियन) क बारे में सोचा, जउन बलि क चीज खात हीं। का ओनकर ओह वेदी में साझेदारी नाहीं अहइ? 19इ बात क मोरे कहइ क प्रयोजन का बा? का मई इ कहई चाहित ह कि मूर्तियन पर चढ़ावा गवा भोजन कछू महत्व क बाटइ? या कि मूर्ति कछू भी नाहीं बाटइ। 20बल्कि मई इ कहत हउँ कि अधर्मी जउन बलि चढ़ावत हीं, उ पचे परमेस्सर क बरे नाहीं बल्कि दुस्ट आतिमन क बरे चढ़ावत हीं। मई नाहीं चाहत हउँ कि तू पचे दुस्ट आतिमन क बरे चढ़ावा। मई नाहीं चाहित कि तू दुस्ट आतिमन क साझेदार बना। 21तू पभू क कटोरा अउर सड़तान क कटोरा में स एक साथ नाहीं पी सकत्या। तू सबइ पभू क भोज क चौकी अउर दुस्ट आतिमन क खाना क चौकी, दुइनों में एक साथे हींसा नाहीं बटाइ सकत्या। 22का हम पभू क चिढ़ावइ चाहित ह? का जेतना सक्तिसाली उ अहइ, हम ओसे जियादा सक्तिसाली हई?

आपन स्वतन्त्रता क प्रयोग परमेस्सर क महिमा क बरे करा

23जइसेन की कहा गवा बा कि, "हम कछू भी करइ क बरे स्वतन्त्र हई।" पर सब कछू हितकारी तउ नाहीं अहई। "हम कछू भी करइ क बरे स्वतन्त्र हई।" मुला हर कउनो बात स बिसवास मजबूत तउ नाहीं होत। 24केउ क भी मात्र सुवारथ क ही चिन्ता न करइ चाही बल्कि अउरन क भलाई क बारे में सोचइ चाही।

25बजार में जउन कछू बिकाइ, अपने अन्तरमने क अनुसार उ सब कछू खा। ओकरे बारे कउनउ प्रस्न न करा। 26काहेकि सास्तर कहत ह, "इ धरती अउर एह पर जउन कछू बा, सब पभू क अहइ।" *

27अगर अबिसवासियन में स कउनउ मनई तोहे खाना पर बोलवाइ अउर तू उहाँ जाइ चाहत अहा तउ तोहे सामने जउनउ परोसा गवा बा, आपने अन्तर्मने क अनुसार सब खा। कउनउ प्रस्न न पूछा। 28मुला अगर केउ तोहे लोगन क इ बतावइ, "इ देवता पर चढ़ावा गवा चढ़ावा अहइ" तउ जे तोहे इ बतावइ, ओकरे कारण अउर अपने अन्तर्मने क कारण ओका न खा। 29मई जब अन्तर्मन कहत हउँ तउ हमार मतलब तोहे अन्तर्मने स नाहीं बल्कि ओह दुसरे मनई क अन्तर्मने स बा। एकमात्र इहई कारण अहइ। काहेकि मोर स्वतन्त्रता भला दूसरे मनई क अन्तर्मने क जरिये लीन्ह गए निर्णय स सीमित काहे रहइ? 30अगर मई धन्यवाद दइके, खाना में हिस्सा लेइत ह तउ जेह चीज क बारे में मई परमेस्सर क धन्यवाद देइत ह, ओकरे बरे मोर आलोचना नाहीं कीन्ह जाइ चाही।

31इही बरे चाहे तउ खा, चाहे पिआ, चाहे कछू अउर करा, बस कछू परमेस्सर क महिमा क बरे करा। 32यहूदियन क बरे रहा या गैर यहूदियन क बरे जउन परमेस्सर क कलीसिया क अहई, ओनके बरे कभउँ बाधा न बना। 33जइसे मई खुद सब तरह स हर कउनो क खुस रखइ क जतन करत अहउँ, अउर बिना इ सोचे कि मोर सुवारथ का अहइ, परमार्थ क सोचत हउँ ताकि ओनकर उद्धार होइ।

11 तउन तू लोग वइसेन ही मोर अनुसरण करा जइसेन मई मसीह का अनुसरण करित हउँ।

अधीन रहा

2मई तोहर प्रसंसा करत हउँ। काहेकि तू मोका हर समइ सुमिरत करत रहत ह; अउर जउन सिच्छन मई तोहे दिहे हउँ, ओनका सावधानी स पालन करत रहया। 3पर मई चाहित ह कि तू इ जान ल्या कि स्त्री क सासक पुरुस अहइ, पुरुस क सासक मसीह अहइ, अउर मसीह क सासक परमेस्सर अहइ। 4हम अइसेन मनई जउन

सिर ढाँकिके पराथना करत ह या परमेस्सर कईती बोलत ह, उ आपन प्रधान क अपमान करत ह।⁵पर हर एक अइसी स्त्री जउन बिना सिर ढाँकिके पराथना करत ह या जनता में परमेस्सर कईती बोलत ह, उ अपने प्रधान क अपमानित करत ह। उ ठीक ओह स्त्री क समान अहइ जे आपन सिर मुंडवाइ दिहे अहइ।⁶अगर कउनउ स्त्री आपन सिर नहीं ढाँकत तउ उ अपने बालउ काहे नहीं मुँडवाइ लेत। मुला अगर स्त्री क बरे बाल मुँडवाउब लजा क बात अहइ तउ ओका आपन मुँडू ढाँकइ चाही।⁷मुला पुरुस क बरे आपन मुँडू ढकब अच्छा नहीं बा काहेकि उ परमेस्सर क सरूप अउर महिमा क प्रतिबिम्ब अहइ। मुला एक स्त्री आपन पुरुस क महिमा क प्रतिबिम्ब करत ह।⁸हम अइसेन एह बरे कहत हई काहेकि पुरुस कउनो स्त्री स नहीं, बल्कि स्त्री पुरुस स बनी बाटइ।⁹पुरुस स्त्री क बरे नहीं रचा गवा बल्कि स्त्री क रचना पुरुस क बरे कीन्ह गइ बा।¹⁰इही बरे परमेस्सर तउ ओका जउन अधिकार दिहे अहइ, ओकर प्रतीक रूप स स्त्री क चाही कि उ आपन मुँडू ढाकइ। ओका सरगदूत क कारण अइसेन करइ चाही।

¹¹फिन भी उ पभूँ मैं न तउ स्त्री पुरुस स स्वतन्त्र अहई अउर न तउ पुरुस स्त्री स।¹²काहेकि जइसेन पुरुस स स्त्री आइ, वइसेन ही स्त्री पुरुस क जनम दिहेस। मुला सब केउँ परमेस्सर स आवत ही।

¹³खुद निर्णय करा। का एक स्त्री क मुँडू उघारे परमेस्सर क पराथना करब अच्छा लागत ह? ¹⁴का खुद प्रतीक तोहे नहीं देखॉवत कि अगर केउ पुरुस आपन बाल लम्बा बड़ देइ तउ इ ओकरे बरे सरम क बात अहइ।¹⁵अउर इ कि एक स्त्री क बरे इहइ ओकर सोभा अहइ? सहीयउँ में ओका ओकरे लम्बा बाल एक प्राकृतिक ओढ़नी क रूप में दीन्ह गवा बा।¹⁶अब एँह पर अगर कउनउ बिबाद करइ चाहइ तउ हमका कहइ क होइ कि न तऊ हमरे इहाँ कउनउ अइसेन प्रथा परमेस्सर क कलीसिया में नहीं बा।

पभूँ क भोज

¹⁷अब इ आदेस देत हईँ मईँ तोहर प्रसंसा नहीं करत हईँ काहेकि तोहर आपस में मिलब तोहार भला करइ क बजाय तोहे हानि पहुँचावत बा।¹⁸सबसे पहिले इ कि मईँ सुने हईँ कि तू लोग सभा में जब परस्पर मिलत हया त तोहरे बीच मतभेद रहत ह। कछू अंस तक मईँ एह पर बिसवास करत हईँ।¹⁹आखिरकार तोहरे बीच मतभेद भी होइहीं। जेहसे कि तोहरे बीच में जउन अच्छा ठहरावा गवा बा, उ सामने आइ जाइ।²⁰तउन जब तू आपस में इकट्ठा होत ह तउ सचमुच पभूँ क भोज पावइ क बरे नहीं एकट्ठा होत्या, ²¹मुला जब तू भोज ग्रहण करत ह त तोहमों स हर केऊँ आगे बढ़ि क अपनेन ही खाना पर

टूट पड़त ह। अउर बस केउ मनईँ तउ भूखइ ही चला जात ह, जब कि कउनउ मनईँ बहुत जियादा खाइ-पी क मस्त होइ जात ह।²²का तोहरे लगे खाइ-पीअइ क बरे आपन घर नहीं बा। अउर एह तरह तू परमेस्सर क कलीसिया क अनादर नहीं करत अहा? अउर जउन दीन अहईँ ओनकर तिरस्कार करइ क चेस्टा नहीं करतेन? मईँ तोहसे का कहीं? एकरे बरे का मईँ तोहर प्रसंसा करउँ। एह बिसय में तोहार प्रसंसा न करब।²³काहेकि जउन सीख मईँ तोहे सबन क दिहे हईँ, उ हमका पभूँ स मिली रही। पभूँ ईसू त ओह रात, जब ओका मरवाइ डालइ क बरे पकड़वावा ग रहा, एक टु रोटी लिहिस, ²⁴अउर धन्यबाद देइ क बाद, उ ओका तोड़ेस अउर कहेस, “इ मोर देह अहइ, जउन तोहरे बरे बा। मोका याद करइ क बरे तू अइसेन ही किहा करा।”²⁵उ भोजन कइ चुकइ क बाद इही तरह उ कटोरा उठाएस अउर कहेस, “इ कटोरा मोरे लहूँ क जरिये कीन्ह गवा एक नवा करार अहइ। जब कभईँ तू एका पिआय तबहिँ मोका याद करइ क बरे अइसेन करा।”²⁶काहेकि जेतनी बार उ तू एँह रोटी क खात ह अउर एह कटोरा क पिअत ह, ओतनी बार जब तलक उ आइ नहीं जात, तू पभूँ क मउत क प्रचार करत रहा।

²⁷अतः जब केउ पभूँ क रोटी या पभूँ क कटोरा क अनुचित रूप स खात-पिअत ह, उ पभूँ क देह अउर ओकर लहूँ क बरे अपराधी होइ।²⁸मनईँ क चाहे कि उ पहिले अपने क परखइ अउर तब इ रोटी क खाई अउर इ कटोरा क पिअइ।²⁹काहेकि पभूँ क देह क मतलब समझे बिना जउन एह रोटी क खात ह अउर एह कटोरा क पिअत ह, उ एह तरह खाइ-पीके अपने उप्पर सजा क बोलावत ह।³⁰इही बरे तउ तोहमों स बहुत लोग कमजोर अहईँ बीमार अहईँ अउर बहुत स त चिरन्दिन मँ सोइ ग अहईँ।³¹मुला अगर हम अपने आप क अच्छे तरह स परख लिहे होइत हमका पभूँ क सजा न भोगइ पड़ी।³²पभूँ हमका अनुसासित करइ क बरे सजा देत था ताकि हमका संसार क साथे दण्डित न कीन्ह जाइ।

³³एह बरे कि हे मोर भाइयो तथा बहिनियो, जब भोजन करइ त एकट्ठा होत ह तउ परस्पर एक दूसरे क इन्तजार करा।³⁴अगर सहीयउँ में कउनो क बहुत भूख लगी होइ तउ ओका घरे पर खाइ लेइ चाही ताकि तोहार एकत्र होइ तोहरे बरे दण्ड क कारण न बनइ। अउर, दूसर बातन क जब मईँ अउबइ तबइ सुलझाउब।

पवित्तर आत्मा क बरदान

12 भाइयो तथा बहिनियो, अब मईँ चाहत हईँ कि तू आत्मा क बरदान क बारे में जाना। तू जानत अहा कि जब तू विधर्मी रहया तब तोहे गूंगी जड़ मूर्तियन कईती जइसेन भटकावा जात रहा, तू वइसेन ही भटकाव

रह्या।³तउन मई तोहे बतावत हई कि परमेस्सर क आतिमा क बोलइ वाला कउनउ इ नाही कहत, "ईसू क प्रप लगइ" अउर पवित्र आतिमा क बगैर मदद द्वारा कहइवालन क न केउ इ कहि सकई, "ईसू पभू अहइ।"

⁴हर एक क आतिमा क अलग-अलग बरदान मिला बा। मुला ओनका देइवाली आतिमा तउ एकइ बा।⁵सेवा कइउ तरह क निश्चित कीन्ह गइ बाटिन मुला हम सब जेकर सेवा करत अही उ पभू तउ एक ही अहइ।⁶काम-काज बहुत स बतावा गवा बाटेन मुला सबहिं क बीच सब कामन क करइवाला उ परमेस्सर तउ एक ही अहइ।⁷सब कउनो मैं आतिमा केउ न केउ रूपे मैं परगट होत ह जउन हर एक क भलाइ क बरे होत ह।⁸कउनो क आतिमा क जरिये परमेस्सर क गियान स युक्त भइ बोलइ क योग्यता दीन्ह गइ बा। तउ केउ क उही आतिमा क जरिये दिव्य गियान क प्रबचन क योग्यता।⁹अउर केउ क उही आतिमा द्वारा बिसवास क बरदान दीहा गवा बा तउ केउ क चंगा करइ क छमता ऊही आतिमा क जरिये दीन्ह गइ बा।¹⁰अउर केउ दूसरे मनई क अद्भुत कारजन करइ क सकती दीन्ह गइ बा तउ केउ दूसरे क परमेस्सर कइती स बोलइ क सामर्थ्य दीन्ह गवा बा। अउर केउ क मिली बा भली बुरी आतिमा क अन्तर क पहिचानइ क सकती कउनो क अलग-अलग भाखा बोलइ क सकती मिली भइ बा; तउ केउ क भाखा क बियाखिया कइके ओकर मतलब निकालइ क सकती।¹¹मुला इ उहई एक आतिमा बा जउन जेह-जेह क जइसेन-जइसेन ठीक समझत ह, देत भए इन सब बातन क पूरा कइ सकत ह।

मसीह क देह

¹²जइसेन हममें स हर एक क सरीर तउ एकइ बा, पर ओहमाँ अंग कइयउ बाटेन। अउर यद्यपि अंगन क कइयउ रहत भए ओनसे देह एकइ बनत ह वइसेन ही मसीह अहइ।¹³काहेकि चाहे हम यहूदी रहा अही, चाहे गैर यहूदी, सेवक होइ य स्वतन्त्र। एकइ सरीर क विभिन्न अंग बनी जाइ क बरे हम सब क एकइ आतिमा द्वारा बपतिस्मा दीन्ह गवा अउर पियास बुझावइ क हम सब क एकइ आतिमा दीन्ह गइ बा।

¹⁴अब देखा, मनई सरीर कउनो एक अंग स ही तउ बना नाही होत, बल्कि ओहमाँ बहुत स अंग होत हीं।¹⁵अगर गोइ कहई, "काहेकि मई हाथ नाही हउँ, इही बरे मोर सरीर स कउनउ सम्बन्ध नाही तउ इही बरे का उ सरीर क अंग न रही।"¹⁶इही तरह अगर कान कहइ, "काहेकि मई आँख नाही हउँ," एह बरे मई सरीर क नाही हउँ।" तउ का इही कारण स उ सरीर क अंग न रही।¹⁷अगर एक आँख ही सब सरीर होत तउ सुना कहाँ स जात? अगर कान ही सब सरीर होत तउ सूर्घों कहाँ स जात।¹⁸मुला परमेस्सर जइसा ठीक समझैस उ

सही मैं सरीर मैं वइसेन ही स्थान दिहैस।¹⁹तउ सरीर क सब अंग एक जइसा ही होइ जात तउ सरीर ही कहाँ होत।²⁰मुला स्थिति इ बा कि अंग त कइयउ होत हीं मुला सरीर एकइ रहत ह।

²¹आँख हाथे स इ नाही कहि सकत, "मोका तोहार जरूरत नाही बाटइ!" या अइसे ही सिर, गोडन स इ नाही कहि सकत, "हमका तोहार जरूरत नाही!"²²एकरे बिलकूल उल्टा सरीर क अंगन क हम कमजोर समझित ह, उ सबइ बहुत जरूरी होत हीं।²³अउर सरीर क जउने अंगन क हम कम आदरणीय समझित ह, ओनकर हम जियादा धियान रखित ह। अउर हमार गुप्त अंग अउर जियादा सालीनता पाइ लेत हीं।²⁴जब कि हमरे प्रदर्शनीय अंगन क एह तरह क उपचार क जरूरत नाही होत। मुला परमेस्सर तउ हमरे सरीर क रचना एह ढंग स किहैस ह जेहसे ओन अंगन क जउन कम सुन्दर बा अउर जियादा आदर मिलइ।²⁵ताकि देहे मैं कहुँ कउनउ फूट न पड़इ बल्कि देहे क अंग परस्पर एक दुसरे क समान रूप स धियान रखईं।²⁶अगर सरीर क कउनउ एक अंग दुख पावत ह तउ ओकरे साथे सरीर क अउर सभन अंग दुखी होत हीं। अगर कउनउ एक अंग क मान बढ़वत ह त ओकर खुसी मैं सभन अंग हिस्सा बताव थीं।

²⁷एह तरह तू सभन लोग मसीह क देह अहा अउर अलग-अलग रूप में ओकर अंग अहा।²⁸एँतना ही नाही परमेस्सर तउ कलीसिया मैं पहिले प्रेरितन क, दूसरे नबियन क, तीसरे उपदेसकन क फिन अद्भुत कारजन करइ वालन क, फिन चंगा करइ क सकती स युक्त मनइयन क, फिन ओनकर जउन दुसरन क सहायता करत हीं, स्थापित किहे अहइ, फिन अगुवाई करइवालन क अउर फिन ओहन लोगन क जउन विभिन्न भाखा बोल सकत हीं।²⁹का इ सब लोग प्रेरित अहई? का इ सब लोग नबी अहई? का इ सब लोग उपदेसक अहई? का इ सब लोग अचरज काम करत हीं?³⁰का इ सब लोगन क लगे चंगा करइ क सकती बाटइ? का इ सब लोग दूसर भाखा बोलत हीं?³¹हाँ, मुला आतिमा क अउर बड़ा बरदान पावइ क बरे यत्न करत रहा। अउर इ सबन क बरे अच्छा रस्ता तू पचन क अब मई देखउव।

पिरेम महान बा

13 अगर मई मनइयन अउर सरगदूतन क भाखा बोल सकउँ मुला मोहेमाँ पिरेम न होइ, तउ मई एक बाजत भआ सिरिफ घड़ियाल या झंकारत भइ झाँझ अहउँ।²अगर मई परमेस्सर कइती स बोलइ क सकती क बरदान प्राप्त करउँ अउर जदि मई परमेस्सर क सबइ रहस्थन क जानत होउँ अउर समूचा दिव्य गियान मोरे लगे होइ अउर एँतना बिसवास उ मोका होइ कि

पर्वतन क अपने स्थान स सरकाइ सकउँ, मुला मोहेमाँ पिरेम न होइ तउ मई कछू नाहीं अहउँ।³ अगर मई आपन सारी सम्पत्ति थोड़-थोड़ कइके जरूरत मन्द क बरे दान कइ देउँ अउर अब चाहे अपने सररी तक क जलाइ डालइ क बरे सौप देउँ मुला अगर मई पिरेम नाहीं करित तउ।

⁴एहसे मोर भला होइवाला नाहीं बा। पिरेम धीरजपूर्ण बा, पिरेम दयामय बा, पिरेम मँ ईसा नाहीं होत, पिरेम आपन प्रसंसा आप नाहीं करत।⁵ उ अभिमानी नाहीं होत। उ अनुचित व्यवहार कबहुँ नाहीं करत, उ सुवार्थी नाहीं बा, पिरेम कबहुँ झुँझलात नाहीं, उ बुराइयन क कउनउ लेखा-जोखा नाहीं रखत।⁶ बुराइ पर कबहुँ ओका खुस नाहीं होतइ। उ तउ दुसरन क साथे सत्य पर आनंदित होत ह।⁷ उ हमेसा रच्छा करत ह, उ हमेसा बिसवास करत ह। पिरेम हमेसा आसा स भरा रहत ह। उ सहनशील बा।⁸ पिरेम अमर बा। जब कि भविस्सबाणी करइ क सामर्थ तउ समाप्त होइ जाई, दूसर भाखा क बोलइ क छमता स जुरी भइ जीभ एक दिन चुप होइ जइहीं, दिव्य गियान क उपहार जात रही,⁹ काहेकि हमार गियान तउ अधूरा बा, हमार सब भविस्सबाणी अपूर्ण बाटिन।¹⁰ मुला जब पूर्णता आई तउ उ अधूरापन चला जाई।¹¹ जब मई गदला रहे तउ एक गदला क तरह ही बोला करत रहे, वइसेन ही सोचत रहे अउर उही तरह सोच विचार करत रहे, मुला अब जब मई बाढिके मनई बनि गवा हउँ, तउ उ बचपने क बात जात रही बाटइ।¹² काहेकि अबहिँ तउ दरपन मँ हमका एक धुँधली सी छाया देखोइ पड़त रही बा मुला पूरी तरह मिलि जाए पइ हम पूरी तरह आमने-सामने देखबा। अबहिँ तउ मोर गियान तनिक बा मुला समइ आवइ पर उ पूरा होये। वइसे ही जइसे परमेस्सर मोका पूरी तरह जानत ह।¹³ इही बीच बिसवास, आसा अउर पिरेम तउ बना ही रहई अउर इन तीनऊ मँ सबसे महान बाटइ पिरेम।

आत्मिक बरदानन क कलीसिया क सेवा मँ लगावा

14 पिरेम क रस्ता पर कोसिस करत रहा। अउर आध्यात्मिक बरदानन क निष्ठा क साथे अभिलास करआ। बिसेस रूप स परमेस्सर क तरफ स बोलइ क।

²काहेकि जेका दुसरन क भाखा मँ बोलइ क बरदान मिला ब, उ तउ सही मँ लोगन स नाहीं, बल्कि परमेस्सर स बात करत बाटइ। काहेकि ओका केउ समझ नाहीं पावत, उ त आतिमा क सक्ति स रहस्यमय होइके बानी बोलत बा।³ मुला उ जेका परमेस्सर कइँती स बोलइ क बरदान मिला बा, उ लोगन स ओन्हे आतिमा मँ मजबूत प्रोत्साहन अउर चैन पडुँचावइ बरे बोलत बा।⁴ जेका विभिन्न भाखन मँ बोलइ क बरदान मिला बा उ तउ बस आपन आतिमा क ही मजबूत करत ह मुला जेका परमेस्सर

कइँती स बोलइ क सामर्थ मिला बा उ समूची कलीसिया क आध्यात्मिक रूप स मजबूत बनावत ह।

⁵अब मई चाहत हउँ कि तू सबइ दूसर कइयउ भाखा बोला। मुला एहसे जियादा मई इ चाहित हउँ कि तू परमेस्सर कइँती स बोल सका काहेकि कलीसिया क आध्यात्मिक मजबूती क बरे अपने कहे क बिाखिया करइवाले क छोड़िके, दूसरी भाखा बोलइवालन स परमेस्सर कइँती स बोलइवाला बड़ा बा।

⁶तउन भाइयो तथा बहिनियो, अगर दूसरी भाखन मँ बोलत भआ मई तोहरे लगे आवउँ तउ एहसे तोहार का भला होइ, जब तलक कि तोहरे बरे मई कउनउ रहस्य उद्घाटन, दिव्य गियान, परमेस्सर क सन्देश या कउनउ उपदेश न देउँ।⁷ इ बोलब त अइसेन ही होइ जइसे कउनो बाँसुरी या सांगरी जइसेन निर्जीव बाजा क आवाज। अगर कउनो बाजा क स्वरन मँ परस्पर साफ अन्तर न होइ तउ कउनउ कइसे पता लगाइ पाई कि बाँसुरी या सांगरी पर कउन स धुन बजाइ जात बा।⁸ अउर अगर बिगुल स अस्पष्ट आवाज निकलइ लागइ तउ फिन युद्ध क बरे तइयार के होई? इही तरह कउनो दूसरे क भाखा मँ जब तक कि तू साफ-साफ न बोला, तब तलक केऊँ कइसेन समझ पाई कि तू का कहे रहा। काहेकि अइसेन मँ तू बस हवा मँ बोलइवाला ही रहि जाव्या।¹⁰ एहमँ कउनउ संदेह नाहीं बा कि संसार मँ भौँति-भौँति क बोली अहई अउर ओहमँ स कउनउ खराब नाहीं अहइ।¹¹ तउन अब तलक मई ओह भाखा क जानकार नाहीं हउँ, तब तलक बोलइवालन क बरे मई एक अजनबी ही रहबइ। अउर उ बोलइवाला मोरे बरे एक तु अजनबी ही ठहरी।¹² तोह पइ इ बात लागू होत ह काहेकि तू आध्यात्मिक बरदानन क पावइ बरे उत्सुक अहा। इही बरे ओहमँ भरपूर होइ क प्रयास करा। जेहसे कलीसिया क आध्यात्मिक मजबूति मिली जाइ।

¹³ परिणामस्वरूप जउन दूसर भाखा मँ बोलत ह, ओका पराथना करई चाही कि उ आपन कहे क मतलब भी बताइ सकइ।¹⁴ काहेकि अगर मई कीहींउ अउर भाखा मँ पराथना करउँ तउ मोर आतिमा त पराथना करत रही होत ह मुला मोर बुद्धि बेकार रहत ह।

¹⁵ तउ फिन का करइ चाही? मई आपन आतिमा स तउ पराथना करबइ। मुला ओकरे साथ आपन बुद्धि स भी पराथना करबइ। आपन आतिमा स त ओकर स्तुति करबइ ही मुला आपन बुद्धि स भी ओकर स्तुति करबइ।¹⁶ काहेकि अगर तू केवल आपन आतिमा स ही कउनउ आसीबाद द्या तउ हुवाँ बइठा कउनउ मनई जउन बस सुनत अहइ, तोहरे धन्यवाद पर "आमीन" कइसे कहि देई काहेकि तू जउन कहत अहा, ओका उ जनबइ नाहीं करत।¹⁷ अब देखा तू तउ चाहे भली-भौँति धन्यवाद देत अहा मुला दूसर मनई क तउ ओसे कउनउ आध्यात्मिक मजबूति नाहीं होत।

¹⁸मई परमेस्सर क धन्यवाद देत हउँ कि मई तोसे बढकर क विभिन्न भाखा बोलि सकित हउँ। ¹⁹मुला कलीसिया सभा क बीच कउनो दूसरी भाखा मँ दसहु हज़ार सब्द बोलइ क अपेच्छा आपन बुद्धि क उपयोग करत हुए पाँच सब्द बोलब अच्छा समझत अहउँ ताकि दूसरे क भी उपदेस दइ सकउँ।

²⁰भाइयो तथा बहिनियो, अपने बिचारन मँ गदेलन क नाई रहा बल्कि बुराइयन क बारे मँ अबोध गदला जइसेन बना रहा। मुला आपन चिन्तन मँ समझदार बना। ²¹व्यवस्था मँ लिखा बा:

“उपयोग ओनकर करत भए अउर बोली बोलत जउन, ओनके ही मुँहन क, उपयोग करत भए जउन क पराया मई करबइ बात एगसे पर न इ हमार सुनिहीं बात तब भी।”

यसायाह 28:11-12

पभू अइसेन ही कहत ह।

²²तउन दूसर भाखा बोलइ क बरदान अबिसवासियन क बरे संकेत अहइ न कि बिसवासियन क बरे अहइ। जब कि भविस्सबाणी करब अबिसवासियन बरे नाहीं बल्कि बिसवासियन बरे अहइ। ²³तउन अगर समूचा कलीसिया एकट्ठ होइ अउर हर केऊँ दूसर-दूसर भाखा मँ बोलत होइ तब भी बाहर क लोग या अबिसबासी भितर आइ जाई तउ का उ पचे तोहे पागल न कइहीं। ²⁴मुला अगर हर केउ परमेस्सर कइँती स बोलत होई अउर तब तलक कछू अबिसवासी या बाहर क आइ जाई त का सब लोग ओका ओकर पाप क बोध न कराइ देइहीं। सब लोग जे कहत हीं, ऊही पइ ओकर निआव होई। ²⁵जब ओकरे मने क भितर छिपा भेद खुली जाइ तब तलक उ इ कहत भआ, “सचमुच तोहरे बीच परमेस्सर अहइ” ढण्डवत प्रणाम कइके परमेस्सर क आराधना करिहीं।

तोहर सभा अउर कलीसिया

²⁶भाइयो तथा बहिनियो! तउ फिन का करइ चाही? तू जब एकट्ठा होत ह तोहमँ स कउनउ भजन, कउनउ उपदेस अउर कउनउ आध्यात्मिक रहस्य क उद्घाटन करत ह। कउनउ केउ अउर भाखा मँ बोलत ह त कउनउ ओकर बियाखिया करत ह। इ सब बात कलीसिया क आध्यात्मिक मजबूती क बरे कीन्ह जाइ चाही। ²⁷अगर केउ अउर भाखा मँ बोलत बाटइ तउन जियादा स जियादा दुइ या तीन क ही बोलइ चाही अउर बारी बारी, एक-एक कइके अउर जउन कछू कहा गवा बा, एक-एक क ओकर बियाखिया करइ चाही। ²⁸अगर उहाँ बियाखिया करइवाला केउ न होइ तउ बोलइवाले क चाही कि उ सभा मँ चुपइ रहइ अउर फिन ओका अपने आप स

अउर परमेस्सर स ही बात करइ चाही। ²⁹परमेस्सर कइँती स ओकर दूत क रूप मँ बोलइ क जेनका बरदान मिला बा, अइसेन दुइ या तीन नबियन क ही बोलइ चाही अउर दूसरन क चाही कि जउन कछू उ कहे अहइ, उ ओका परखत रहइ। ³⁰अगर हुवाँ केउ बइठा भआ पर कउने क बात रहस्य उद्घाटन होत ह जउन परमेस्सर कइँती स बोलत अहइ पहिला वक्ता क चुप होइ जाइ चाही। ³¹काहेकि तू एक-एक कइके भविस्सबाणी कइ सकत ह्या ताकि सबहिँ लोग सीखई अउर प्रोत्साहित होई।

³²नबियन क आतिमन नबियन क बस मँ रहत हीं।

³³काहेकि परमेस्सर अव्यवस्था नाहीं देत, उ सान्ति देत ह। जइसेन कि सन्तन क सभन कलीसियन मँ होत ह।

³⁴स्त्रियन क चाही कि उ कलीसियन मँ चुप रहई काहेकि ओन्हे सान्त रहइ चाही, बल्कि जइसेन कि व्यवस्था मँ कहा गवा बा, ओनका दबिके रहइ चाही। ³⁵अगर उ कछू जानइ चाहत ह तउ ओन्हे घरे पे आपन-आपन पति स पूछइ चाही काहेकि एक स्त्री क बरे समनाक अहइ कि उ सभा मँ बोलइ।

³⁶का परमेस्सर क बचन तोहसे पैदा भवा बा? या उ मात्र तोहे तलक पहुँचा? निश्चित नाहीं बा। ³⁷अगर केउ सोचत ह कि उ नबी अहइ अउर ओका कछू आध्यात्मिक बरदान मिला बा तउ ओका पहिचान लेइ चाही कि मई तोहे जउन कछू लिखत हउँ, उ पभू क आदेस बा। ³⁸तउन अगर केउ एँका नाहीं पहिचान पावत तउ ओका उ परमेस्सर द्वारा भी नाहीं जाना चाई।

³⁹एह बरे मोर भाइयो तथा बहिनियो, परमेस्सर कइँती स बोलइ क तत्पर रहा अउर दूसर भाखा मँ बोलइ वालन क भी न रोका। ⁴⁰मुला इ सभन बातन सही ढंग स अउर व्यवस्थानुसार कइ जाइ चाही।

ईसू क सुसमाचार

15 भाइयो तथा बहिनियो, अब मई तोहे सबन क ओह सुसमाचार क याद दिवावइ चाहत हउँ जेका मई तोहे सुनाए हउँ अउर तूहउ सबे जेका ग्रहण किहे रह्या अउर जेहमँ तू हमेसा स्थित बना भवा अहा। ²अउर जेकरे जरिये तोहर उद्धार भी होत बा बसतै तू ओन्हन सब्दन क जेका मई तोहे आदेस दिहे रहेउँ, अपने मँ मजबूती स थामे रखा। (नाहीं तउ तोहर बिसवास धारन करबइ ही बेकार गवा।)

³जउन सबसे पहिले बात मोका मिली भइ रही, ओका मई तोहे तलक पहुँचाइ दिहेउँ कि पवित्तर सास्तरन क अनुसार, मसीह हमरे पापन क बरे मरा ⁴अउर ओका दफनाइ दीन्ह गवा। अउर पवित्तर सास्तरन क अनुसार फिन तीसरे दिन ओका जियाइके उठाइ दीन्ह गवा। ⁵अउर फिन उ पतरस क सामने परगट भवा अउर ओकरे बाद बारह प्रेरितन क उ दर्सन दिहिस।

फिन उ पाँच सऊ स भी जियादा भाइयन क एक साथे देखेइ दिहेस। ओनमाँ स बहुतेरे आज तलक जिन्दा अहई। जद्यपि कछू क मउत भी होइ चुकी बा।⁷ एकरे बाद उ याकूब क सामने परगट भवा। अउर तब उ सभी प्रेरितन क फिन दर्सन दिहेस।⁸ अउर सब स अंत में ओ मोका भी केउ दर्सन दिहेस। मई तउ समइ स पहिले असामान्य जन्मा सतमासा बच्चा जइसेन अहउँ।

⁹ काहेकि मई तउ प्रेरितन में सबसे छोटका हउँ। इहाँ तलक कि मई तउ प्रेरित कहवावइ क योग्य नाहीं हउँ, काहेकि मई तउ परमेस्सर क कलीसिया क सतावा करत रहेउँ।¹⁰ मुला परमेस्सर क अनुग्रह स मई वइसेन बना हउँ जइसेन आज अहउँ मोहे पइ ओनकर अनुग्रह बेकार नाहीं गवा। मई त ओन सबसे बड़ी चढ़ी क मेहनत किये हउँ, जद्यपि उ मेहनत करइवाला मई नाहीं रहेउँ, बल्कि परमेस्सर क उ अनुग्रह रहा जउन मोरे साथे रहत रहा।¹¹ तउन चाहे तोहे मई उपदेस दिहे होइ चाहे ओ, मई सब इहई उपदेस देइत ह अउर इही पइ तू बिसवास किये अहा।

हमार पुनरुत्थान

¹² मुला जब कि मसीह क मरे भएन में स पुनरुत्थान कीन्ह गवा तउ तोहमाँ स कछू अइसेन काहे कहत बाटेन कि मउत क बाद फिन स जी उठब सम्भव नाहीं बा।¹³ अउर अगर मउत क बाद जी उठब ही नाहीं तउ फिन मसीह क मउत क बाद नाहीं जियावा गवा।¹⁴ जदि मसीह नाहीं जिया तउ हमार उपदेस देब बेकार बा अउर तोहार बिसवास भी बेकार बा।¹⁵ अउर हमहूँ फिन तउ परमेस्सर क बारे में झूठा साच्छी ठहरत अही काहेकि हम तउ परमेस्सर क सामने कसम खाइके इ साच्छी दिहे अही कि उ मसीह क मरे भएन में स जियाएस। मुला उनके कहइ क अनुसार अगर मरा भवा जियावा नाहीं जात तउ फिन परमेस्सर मसीह क भी नाहीं जियाएस।¹⁶ काहेकि अगर मरा भवा नाहीं जियाइ जात ह तउ मसीह क भी नाहीं जियावा गवा।¹⁷ अउर अगर मसीह क फिन स जिन्दा नाहीं कीन्ह गवा रहा, फिन तउ तोहार बिसवास भी बेकार बा, अउर तू अबहूँ अपने पापन में फँसा भवा ह।¹⁸ हाँ, तउ फिन जे मसीह क बारे आपन प्रान दइ दिहेन, उ सबइ अइसेन ही खतम भएन।¹⁹ अगर हम केवल अपने भौतिक जीवन क बारे ही ईसू मसीह में आपन आसा रखे रही तब तउ हम अउर सबहिँ लोगन स जियादा अभागा हई।

²⁰ मुला अब सहीमें इ अहइ कि मसीह क मरे भएन स जियावा गवा। उ मरे भएन क फसल क पहिला फल अहइ।²¹ काहेकि जब एक ही मनई क द्वारा मउत आइ तउ एक मनई क द्वारा ही मउत स फिन जिन्दा होइ उठा।²² काहेकि ठीक वइसेन ही जइसेन आदम क कर्मन क कारण हर किहू क बरे मउत आइ, वइसेन ही

मसीह क द्वारा सबक फिन स जियाइ उठावा जाई।²³ मुला हर एक क ओकरे अपने करम क अनुसार सबसे पहिले मसीह क, जउन फसल क पहिला फल अहइ अउर फिन ओकरे पुनः आवई पर ओनकर, जउन मसीह क अहेन।²⁴ एकरे बाद जब मसीह सबन सासकन, अधिकरियन, हर तरह क सक्तियन क अंत कइके राज्य क परमपिता परमेस्सर क हाथन सौंपे देई, तब प्रलय होइ जाई।²⁵ मुला जब तलक परमेस्सर मसीह क सनुवन क ओकरे परमेस्सर नियन्त्रण में न लाइ देइ तब तलक उ अवस्य राज्य करी।²⁶ सबसे आखिरी सनु क रूपे में मउत क नास कीन्ह जाई।²⁷ पवित्र सास्तर कहत ह, “परमेस्सर तउ हर केउ क मसीह क चरनन क अधीन रखे बा।” * अब देखा जब सास्तर कहत ह, “सब कछू” क ओकरे अधीन कइ दीन्ह गवा बा, तउ जउन, सब कछू क ओकरे चरनन क अधीन कीन्हा बाटेन, उ खुदइ एकर अपवाद बा।²⁸ अउर जब सब कछू मसीह क अधीन कइ दीन्ह गवा बा, तउ इहाँ तलक कि खुद बेटवा केऊ ओह परमेस्सर क अधीन कइ दीन्हा जाई, जे सब कछू क मसीह क अधीन कइ दिहेस ताकि हर केउ पइ पूरी तरह परमेस्सर क सासन होइ।²⁹ नाहीं तउ जे अपने परान क दिहे अहई, ओनकइ कारण जउन बपतिस्मा लिहे अहई, उ पचे का करिहीं। अगर मरा हुआ कभई फिन स जिन्दा होतेन नाहीं तउ लोगन क ओनकर बरे बपतिस्मा दीन्ह ही काहे जात अहइ? ³⁰ अउर हमई सब घड़ी संकट झेलत रहित ह? ³¹ भाइयो, तोहरे बरे मोर उ गरब जेहमाँ हमार परभू मसीह ईसू में स्थित होइ क नाते रखत हई, ओका साछी कइके कसम खाइके कहत हई कि मई हर दिन मरित हउँ।³² अगर मई इफिसुस में जंगली पसुवन क साथे मानवीय स्तर पर ही लड़े रहे तउ ओसे मोका का मिला। अगर मरा भवा स जिआवा नाहीं जातेन तउ, “आवा, खाई, पीई काहेकि काल्हि तउ मरिन जाबा।” *

³³ भटकब बन्द करा: “खराब संगत स अच्छी आदत खतम होइ जात हीं।” ³⁴ होस में आवा, अच्छा जीवन अपनावा, जइसेन कि तोहे होइ चाही। पाप करब बन्द करा। काहेकि तोहमाँ स कछू तउ अइसेन अहई जउन परमेस्सर क बारे में कछू भी नाहीं जानतेन। मई इ एह बरे कहत हउँ कि तोहे सरम आवइ।

हमका कइसेन देह मिली?

³⁵ मुला केउ पूछ सकत ह, “मरा भवा कइसे जिआवा जात ह? अउर उ फिन कइसेन देह धारन कइके आवत ह?” ³⁶ तू केतना मूरख अहा। तू जउन बोअत अहा उ जब तलक पहिले मरि नाहीं जात जिन्दा नाहीं होत।

“परमेस्सर ... बा” भजन 8:6

“आवा ... जाब” यसा 22:13; 56:12

³⁷अउर जहाँ तलक जउन तू बोवत अहा, ओकर प्रस्न बा, तउ जउन पऊधा बिकसित होइ क बा, तू ओह भरा-पूरा पऊधा क तउ धरती में नाहीं बोउल्या। बस केवल बीया बोवत अहा, चाहे उ गोहूँ क दाना होइ अउर चाहे कछू अउर क। ³⁸फिन परमेस्सर जइसेन चाहत ह, वइसेन रूप ओका देत ह। हर बीज क उ ओकर आपन सरीर प्रदान करत ह। ³⁹सबहिं जिन्दा मनइयन क सरीर एक जइसा नाहीं होत। मनइयन क सरीर एक तरह क होत ह जबकि पसुवन क सरीर दुसरे तरह क। चिडियन क देह अलग तरह क होत ह अउर मछलियन क अलग। ⁴⁰कछू देह दिव्य होत ह अउर कुछ पाथिव मुला दिव्य देह क आभा एक तरह क होत ह अउर पाथिव सरीर क दुसरे प्रकार क। ⁴¹सूरज क तेज एक तरह क होत ह अउर चाँद क दुसरे तरह क। तारन में भी एक भिन्न तरह प्रकास रहत ह। अउर हाँ, तारन क प्रकास भी एक दुसरे स भिन्न रहत ह।

⁴²तउन जब मरे भए जी उठिहीं तबऊ अइसेन ही होई। उ देह जेका धरती में दफनाइ क “बोवा” गवा बा, नासवान बा मुला उ देह जेकर पुनरुत्थान भवा बा, अबिसवासी बाटइ। ⁴³उ काया जउन धरती में “दफनाई” गइ बा, अनादरपूर्ण बा मुला उ काया जेकर पुनरुत्थान भवा बा, महिमा स मंडित बा। उ काया जेका धरती में “दफनाई” गवा बा, कमजोर बा मुला उ काया जेका फिन स जिन्दा कीन्ह गवा बा, सवितसाली बा। ⁴⁴जेह काया क धरती में “दफनावा” गवा बा, उ प्राकृतिक बा मुला जेका फिन स जिन्दा कीन्ह गवा बा, उ आध्यात्मिक देह अहइ।

अगर प्राकृतिक सरीर होत हीं, तउ आध्यात्मिक सरीरन क भी अस्तित्व बा। ⁴⁵पवित्तर सास्तरन कहत ह: “पहिला मनई (आदम) एक सजीव प्राणी बना।” * मुला अंतिम आदम (ईसू) जीवन दाता आतिमा बना। ⁴⁶आध्यात्मिक पहिले नाहीं अउतेन, बल्कि पहिले आवत हीं भौतिक अउर फिन ओकरे बाद ही आवत हीं आध्यात्मिक। ⁴⁷पहिले मनई क धरती क माँटी स बनावा गवा अउर दूसर मनई सरगे स आवा। ⁴⁸जइसेन ओह मनई क रचना माँटी स भइ, वइसेन ही सबन लोग माँटी स ही बनेन। अउर ओह दिव्य मनई क समान अउर दिव्य मनइयन भी स्वर्गीय बाटेन। ⁴⁹हम उ माटी स बने मनई क तरह बनाए गयेन ह, तउ ओह स्वर्गीय क रूप भी हम धारन करब। ⁵⁰भाइयो तथा बहिनियो, मई तोहे इ बतावत हउँ: लहू अउर माँस क इ पाथिव सरीर परमेस्सर क राज्य क उत्तराधिकार नाहीं पाइ सकतेन। अउर न ही जउन बिनासमान अहँ, उ अविनासी क उत्तराधिकारी होइ सकत हीं। ⁵¹मुना, मई तोहे सबन क एक रहस्यपूर्ण सत्य बतावत हउँ: हम सबन मरबइ न, बल्कि हम सब

बदल दिहा जाबइ। ⁵²जब अंतिम तुरही बजी तब पलक झपकत एक छन मैं ही अइसेन होइ जाई। काहेकि तुरही बजे अउर मरा हुआ अमर होइके जी उठिहीं अउर हम जउन अबहिं जिन्दा हयेन, बदल दिहा जइहीं। ⁵³काहेकि इ नासवान देह क अविनासी चोला क धारन करब जरूरी बा अउर एह मरनसील काया क अमर चोला धारन कइ लेब जरूरी बा। ⁵⁴तउन जब इ नासवान देह अविनासी चोला धारन कइ लेई अउर उ मरणसील काया अमर चोला ग्रहण कइ लेई तउ पवित्तर सास्तर क लिखा इ पूरा होइ जाई।

“विजय त मऊत क निगल लिहा।”

यसायाह 25:8

⁵⁵“अरी ओ मऊत! तोहार बिजय अब कहाँ बा?

अरी ओ मऊत! तोहार दंस कहाँ बा?”

होसे 13:14

⁵⁶पाप मऊत क दंस अहइ अउर पाप क सक्ती मिलत ह व्यवस्था स। ⁵⁷मुला परमेस्सर क धन्यवाद बा जउन पभू ईसू मसीह क जरिये हमका बिजय देवावत ह।

⁵⁸तउन मोर पिआरा भाइयो तथा बहिनियो, अटल बना डटा रहा। पभू क काम क बरे अपने आपके हमेसा पूरा तरह अर्पित कइ द्या। काहेकि तू त जनतइ अहा कि पभू में कीन्ह गवा तोहार काम बेकार नाहीं बा।

दुसरे बिसवासियन क बरे भेंट

16 अब देखा! संतन क बरे दान एकट्ठा करइ क बारे मैं मई गलातियन क कलीसियन क जउन आदेस दिहे हउँ तुहउँ वइसेन ही करा। ²हर रविवार क आपन आय मैं स कछू न कछू अपने घरे पर ही एकट्ठा करत रहा। ताकि जब मई आउँ ओह समइ दान एकट्ठा न करइ पड़इ। ³मोरे ऊहाँ पहुँचइ पर जेह कउनो मनई क तू चाहा, मई ओका परिचय पत्र दइके तोहर उपहार यरूसलेम लइ जाइके बरे भेज देबइ। ⁴अउर अगर मोर जाबऊ अच्छा भवा तउ उ पचे मोरे साथेन चला जइहीं।

पाँलुस क सबइ योजना

⁵मई जब मैसीडोनिया होइके जाबइ तउ तोहरे लगे भी अउबइ काहेकि मैसीडोनिया स होत भवा जाइके कामे क मई निश्चित कइ चुका हउँ। ⁶होइ सकत ह मई कछू समइ तोहरे साथे ठहराउँ या जाड़ा ही तोहरे साथे बितावउँ ताकि जहाँ कहुँ मोक जाइ क होइ, तू मोक बिदा कइ सका।

⁷मई इ त नाहीं चाहित कि उहाँ स जात-जात ही बस तोहसे मिल लेउँ बल्कि मोक तउ आसा बा कि मई

अगर पभू चाही तउ कछू समइ तोहरे साथे रहबइ। ⁸मई पित्तोकुस्त क उत्सव तक इफिसस स ठहरबउँ। ⁹काहेकि ठोस काम करइ क सम्भावना क भी उहाँ बड़ा दुवार खुला बा अउर फिन उहाँ मोर विरोधी भी त बहुत स अहई।

¹⁰अगर तीमुथियुस आइ पहुँचइ त धियान रख्या ओका तोहरे साथे कस्ट न होइ काहेकि मोरे समान ही उहउ पभू क काम करत बा। ¹¹इही बरे कउनउ ओका छोट न समझइ। ओका ओकरे इ यात्रा पर सान्ति क साथे बिदा कर्या ताकि उ मोरे लगे आइ पहुँचइ। मई दूसरे भाइयन क साथे ओकरी अवाई क इन्तजार करत हउँ।

¹²अब हमार भाइ अपुल्लोस क बात इ बा कि मई ओका दूसरे भाइयन क साथे तोहरे लगे जाइ क बहुत जियादा उत्साहित किहे अहउँ। मुला परमेस्सर क इ इच्छा बिल्कुल नाहीं रही कि उ अबहि तोहरे लगे आवत। मुला अवसर पउतइ ही उ आइ जाई।

पौलुस क पत्र क समाप्ति

¹³सावधान रहा। मजबूती क साथे आपन बिसवास मँ अटल बना रहा। ¹⁴साहसी बना, सक्तिशाली बना। तू जउन कछू करा, पिरैम स करा। ¹⁵तू लोग स्तिफनास क घरान क तउ जनबइ करत ह कि उ अखाया क

फन्सल क पहिला फल अहइ। उ परमेस्सर क लोगन क सेवा क बीड़ा उटाए अहइ। तउन भाइयो तथा बहिनियो, तोहसे मोर निवेदन बा कि ¹⁶तू लोग भी अपने आप क अइसेन लोगन क अउर हर ओह मनई क अगुवाई मँ सौप द्या जउन एह काम स जुड़ा बा अउर पभू क बरे मेहनत करत ह।

¹⁷स्तिफनास, फुरतूनातुस अउर अखइकुस क उपस्थिति स मई खुस हउँ। काहेकि मोरे बरे जउन तू नाहीं कइ सक्या, अउर उ पचे कइ देखाएन। ¹⁸उ पचे मोर अउर तोहार आतिमा क आनन्दित किहे अहई। इही बरे अइसेन लोगन क सम्मान करा।

¹⁹एसिया प्रान्त * क कलीसियन कइँती स तोहे पभू मँ नमस्कार! अक्विला अउर प्रिस्क्ल्ला! ओनके घरे पर एकट्ठा होइवाली कलीसिया कइँती स तोहे हार्दिक नमस्कार।

²⁰सबन भाइयो तथा बहिनियो, कइँती स तोहे सबन क नमस्कार। पवित्तर चुम्मा क साथे तू आपस मँ एक दुसरे क सत्कार करा।

²¹मई पौलुस, तोहे सबन क अपने हाथन स नमस्कार लिखत हउँ। ²²अगर केउ पभू मँ पिरैम नाहीं रखतेन तउ ओनका अभिसाप मिलइ। हमार पभू आवा! ²³पभू ईसू क अनुग्रह तोहे सबन क मिलइ। ²⁴ईसू मसीह मँ तोहरे बरे मोर पिरैम तू सबन क साथे रहई।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>